









c 148 Amos de  
Gillon Du Plessis

Amos de  
Gillon Du Plessis



OTTMANN-DUPLANIL

P. J. Boucher.

2100  
L. 19084

Ex pos: Claude J. Angermas  
Docteur: Jean Boucher.

116

# LETTRE MISSIVE DE L'EVEsqVE DV MANS.

Avec la responce à icelle, faicte au mois de  
Septembre dernier passé, par vn Docteur en  
Theologie de la faculté de Paris: en laquelle est  
respondu à ces deux doutes:

*A sçauoir si on peut suivre en seureté de conscience le  
party du Roy de Nauarre, & le recognoistre pour Roy.  
A sçauoir si l'acte de Frere Iacques Clement Iacobi  
d'oit estre approuuë en conscience, & s'il  
est louable, ou non.*



A PARIS,

Chez Guillaume Chaudiere, rue S. Iacques, à l'é-  
seigne du Temps, & de l'Homme Sauvage.

M. D. LXXXIX.

AVEC PERMISSION ET APPROBA-  
tion des Docteurs.



Case

F

39

.326

1589 ang

THE NEWBERRY  
LIBRARY

## AV LECTEUR.

L'Original de la lettre de l'Euesque du Mans  
 Escrit de sa main propre, est entre les mains  
 du Docteur qui y a faict responce. Laquelle re-  
 sponce a esté enleuee en son estude, & mise en  
 lumiere pour le contentemēt de ceux qui pour-  
 roient auoir le mesme scrupule que ledit Eues-  
 que: esperant que ledit Docteur ne trouueroit  
 mauuais ce zele & intention, & recognoistroit  
 vne fidelité en ce que ne se trouuera changé vn  
 seul iota de son exemplaire, hors mis qu'on a  
 adiousté au cours du texte la traductiō de quel-  
 ques passages qu'il n'auoit mis qu'en Latin seu-  
 lemēt, & aussi quelques cottes & Annotatiōs en  
 marge. L'imprimeur peut verifier ce que dessus  
 & satisfaire à tous ceux qui pourroient douter  
 de l'original de l'un ou de l'autre. Au reste ce  
 que voyez de caracteres differens en l'im-  
 pression de la responce, outre les allegations, ce  
 sont les termes repetez de la lettre à laquelle est  
 faicte responce.

4  
LETTRE DE L'EVE-  
que du Mans.



Vec ceste commodité i'ay esté bien aise de vous mander de mes nouuelles, & outre ce que le porteur vous pourra dire, assurer de ma santé, laquelle est graces à Dieu bonne. Mais ie suis en grand doute & incertitude de ce que ie dois & puis faire : Mon humeur & affection ne tire à servir à mon troupeau & c'est ce que plus ie desire. La difficulté est si le puis faire en seureté, les humeurs estans selon qu'on me dict fort aigres contre moy & toute la race, ce que neantmoins ie ne pense tant qu'on crie. L'autre doute est en quel lieu ie le pourrois faire, la ville capitale n'estant libre, ny la plus part des autres, & ma maison estant aussi occupée dont on me pourroit, à mon aduis, laisser iouyr sur ces nouuelles declarations & accidens, si ie voulois inrer d'adherer à l'Vnion, mais ie crains ne le pouuoir avec seureté de conscience, laissant à part si ie le dois & s'il seroit honnesté : la dispute qui est sur le trotouer & qui traueille plusieurs personnes, ne me semblant si aisee à resoudre qu'aucuns pensent. Car bien que la religion & le fondement doime estre le principal en toutes nos actions & conseils, toutesfois ny le vieil Testament ny l'Histoire Ecclesiastique au moins que ie sache ne nous apprend point le peuple de Dieu s'estre opposé par armes à l'establissement des Rois, Empereurs ou Princes, qui par succession ou autre vocation peut estre moins legitime venoient au Royaume ou Empire, iacoit qu'ils fussent Idolatres, Payens ou Heretiques : & la



mansuetude Chrestienne semble vouloir que nous attendions de Dieu ce qu'il luy plaira ordonner sans nous penser plus sages, & opposer par force à ses volontez. D'autre part aussi le danger d'obeir à un heretique & plusieurs considerations sur cela, les censures & declarations de l'Eglise, l'Edict d'Union & serment fait sur iceluy sont de grande consideration. Tout cela est assés pour agiter un esprit qui craind de faillir, & voudrois bien en auoir conferé amplement avec personnes doctes & de pieté qui ne fussent point cōduites de passion. l'espere de la bonté de Dieu qu'il me cōseillera & conduira à ce qui sera de son honneur & mon salut. Pour le present ie ne puis me persuader de deuoir adherer au party de la Ligue qu'ay iusques à la mort du feu Roy iugé cōme cōtre Dieu & raison, & qui ont coroné leur œuvre par un parricide detestable, qui est pour apporter la ruyne au Royaume & à la Religion Catholique, Apostolique & Romaine, si Dieu n'a pitié de nous & ny met la main, ce que ie le supplie vouloir faire. Le porteur vous dira de nos nouvelles particulieres. Et pour vos affaires, si ie puis y seruir de quelque chose, commande, & croyez que ie m'y employeray de tout mon pouuoir. Il a pleu à Dieu nous visiter toute ceste annee, il destournera quand il luy plaira son ire que nous auons bien meritee, & nous fera reluire sa misericorde, dont si ne sentons en ce mode les effects, la patience icy nous les fera trouuer mieux & plus à propos en l'autre & au Royaume celeste. Vous n'estes pas à sçauoir le iugement par lequel Rantigny & Claude ont esté condamnez les dommages & interests des heritiers du Cardinal, faute de pouuoir représenter &c. & qu'ils sont appellans en Rote où la cause est

introduitte, & les heritiers ont bonne esperance que leur droit leur sera gardé. Il a esté enuoyé vne coppie de la sentence à Boné, ie ne sçay s'il l'aura receuë : Si Dieu fait la grace à vo<sup>z</sup> amis de vous renouir bien tost, comme ils esperent, il faudra aduiser à cest affaire là & à plusieurs autres. Ce pendant & tousiours ie vous baise les mains. Si voyez quelques-uns de ces Docteurs en Theologie qui se disoient no<sup>z</sup> amis, ie vous prie leur dire que ie voudrois bien auoir leur aduis & raisons sur le doute qui se presente.



## RESPONCE A CELLE DE MONSIEVR DV MANS.

**M**ONSIEVR, vostre lettre m'a esté  
communiquée comme à vn de ces Do-  
cteurs en Theologie qui se disoient par le  
passé de vo<sup>z</sup> amis : Et neantmoins ie  
confesse auoir faict difficulté de dire mon aduis  
& mes raisons sur le doute qui se presente : tant  
pour ne recognoistre en moy la doctrine & pie-  
té que requerez en ceux avec lesquels en vou-  
driez conferer, ains me recognoissant le moi-  
ndre de nostre profession, voire du tout indigne  
d'estre du corps de la faculté de Paris, quoy que  
à Rome & ailleurs en ayez monstré faire si peu  
d'estat, qu'aussi pour resenter mon style rude &  
scholastique & indigne de vous : outre ce que  
la matiere de laquelle voulez estre esclarcy, a  
esté tant de fois traictée par plusieurs discours  
qui en ont esté faicts depuis peu de temps, que  
ie ne puis quasi appeller ceste mienne responce  
sinon vn transcript ou repetition. Ioint aussi la  
crainte que j'ay que n'ayez ja pris vostre ply,  
côme plusieurs autres soy disans Catholiques,  
*qui cum in profundum venerint contemnunt.* Et ne  
se peuent encores bien resoudre, ou comme  
enforcelez par le deffunct qu'ils regrettent cōti-  
nuellemēt, ou preuenus de vaines esperāces du

*Exorde tiré  
de la fin de  
celle de mon-  
sieur du Mai.*

*La pluspart  
des adberans  
de feu Henry  
de Valois sōt  
aujourd'hui  
endurcis.*



*Ierem. 13.*

Biarnoïs, ou habitez & endurez qu'ils sont en la haine de ceste pource ligue, cōme resolu de se donner plustost au Turc, voire à tous les diables d'ēfer que d'y adherer, me faisans resouuenir du dire du Prophete. *Si potest Ethiops mutare pellē suā, & pardus varietates suas & vos poteritis benefacere cum didiceritis male.* Si l'Ethiopien peut muër sa peau ou le Leopard ses diuerses couleurs, aussi pourrez vous faire le bien quand vous serez accoustumez au mal. Laquelle mesme crainte est fondee tant sur ce qui se dit publiquemēt de vous (à mon grand regret) que sur le stile de vostre missiue contenant beaucoup d'aigreur contre le party qu'auons tousiours reputé le meilleur, & pour lequel nous croyons estre iustement passionné.

*Changemēt  
estrange de  
l'Euesque du  
Mans.*

Et faut que ie vous confesse librement & à la verité (Monsieur) que les premieres annees que j'auois cest hōneur de vous frequēter, ie n'eusse iamais pensé veoir en vous vne si estrange metamorphose, n'apperceuant lors en vos discours, desseings & deportemens qu'une pieté & deuotion que des ieunes, que de l'austerité, que de la spiritualité, que des signes d'une conscience timoree dont m'estoit encores vne fraische confirmation, le grand scrupule que faisiez de laisser vostre Euesché de Noyon pour accepter celuy du Mans que le Roy vous offroit: sur lequel scrupule apres qu'on vous eut dit, que iacoit qu'il ne fut permis pour approcher des vostres, pour auoir plus grand reuenu, ou autre consideration temporelle, *priere Ecclesia relictā*

*relictæ ad aliam consolare*, laissant vostre premiere espouse en prèdre vne seconde. Toutesfois que *propter maius bonum Ecclesiæ*, pour le plus grand bié de l'Eglise il estoit loisible; & encotes pour vostre regard que c'estoit œuvre charitable & meritoire de l'accepter, pour reparer les fautes palpables & trop preiudiciables au diocese du Mans qu'auoit fait (par vostre tesmoignage mesme) vostre feu frere le Cardinal de Rambouillet; vous me distes que pour n'offenser vostre conscience en ce poinct, vous auiez deliberé d'en laisser la definition à sa Saincteté, le iugement & commandement de laquelle vous estiez resolu de suiure en tout & par tout. Si nous tombiõs en propos du Roy, vous en parliez avec aussi grand mescontentement qu'un homme du monde, disant infinies fois que, *induratum erat cor Pharaonis*, le cœur de Pharaon estoit endurcy, & que s'il continuoit ses erres on verroit en brief l'Eglise ruinee, & les François reduicts à tel poinct, qu'auant qu'il fust long temps ils ne se pourroient vanter d'auoir rien à eux, & de fait me disiez ces propres mots, tenât des gands en vos mains, si bien vous en souuiér, *ie ne pourray dire d'icy à un an que ceste paire de gāds soit à moy*. Et comme vne fois ie vous accompagnois chez le feu President la Guesle vostre cousin, vous vous plaignez de luy & ses semblables, que vous disiez entretenir le Roy en ses humeurs. S'il estoit mention de la sainte Ligue, vous me disiez qu'elle estoit entierement necessaire, & que sans cela tout estoit perdu, & que le

Roy auoit besoin de ceste bride, & que la France auroit à iamais obligation aux Princes qui en estoient auteurs, pour estre cause que la religion seroit conseruee, la tyrannie reprimée, le peuple soulagé, & avec le temps toutes choses remises en bon ordre, s'il n'aduenoit par quelque grand defastre, que Dieu nous voulant punir de nos pechez, permist que l'heureux succez de si hautes & saintes entreprinſes ne fut empesché. Et de faict, ie ſçais homme qui ne se pouuant si tost resoudre à approuuer tels deſseings pour le respect qu'il auoit à son Prince naturel qu'il voyoit n'estre de la partie, vous auez esté des premiers qui ont porté coup à son endroit à luy faire trouuer bon, & pour l'opiniõ qu'il auoit de vostre zele & probité, & pour vos bonnes & pertinentes raisons. Et me ſuis maintesfois resiouy en moy-mesme, & loué Dieu pour le libre & familier accez que i'auois avec vous, qui estoit cause que de la source de vostre zele ie puisois beaucoup de bonnes instructions, & par vostre moyen faisois cognoissance à grand nombre d'honnestes gens: dont furent les premiers Monsieur de Fiat, duquel on ne se deffioit alors, cõme depuis on a fait pour son inconstance & maladiſ, ains meſnageoit tresbien vos paquets qu'il receuoit ordinairement par celuy que ſcauez de nos confreres: & aussi monsieur de Bellenglise, l'un des plus vertueux, constans & signalez Catholiques que i'aye congneu entre les Gentils-hommes: avec lesquels & autres de bõne marque vous ſcauez



combien vous auez autresfois sainctement & heureusement negocié. Mais du depuis on vous a apperceu tout à coup tellement changé, que de tous les Prelats de France ne s'en remarque pas vn qui ayt fait plus de mauuais offices que vous à la cause de Dieu & à l'estat de ce Royaume. Dont vn Politique de ceste ville disant vn iour de vous, *Hac mutatio dextera excelsi*, vn autre respondit sur le champ, *hac mutatio sinistra diaboli, à maligno enim factum est istud & est mirabile oculis nostris*. Et ne sçait-on bonnement, à cause des propos diuers qui s'en tiennét, à quoy imputer ceste mutation, sinon ou à l'Euesché qu'auez eu du deffunct avec tant de paroles courtoises que m'auez vn iour vous-mesme recité, ou aux estroictes promesses qu'il vous fait à Rambouillet à son premier giste d'apres les Barricades, ou aux circonuentions, paroles & autres façons magiques, desquelles il estoit soupçonné d'vser, comme estoit le Caracthere qu'il auoit aucunesfois en son parchemin vierge (lequel mesme i'ay veu) autour duquel les paroles escrites portoient que c'estoit pour n'estre abandonné de ses amis & seruiteurs, ou à l'ambition, qui a fait tomber le plus excellent des Anges, ou au vieil leuain duquel vostre famille a esté de long temps entichée. Chacun en discourt à sa guise. Mais quoy qu'il en soit ie vous proteste que ie suis tresmarry que soyiez en si mauuais predicament.

Que si vous vouliez croire l'aduis d'un de vos plus humbles seruiteurs du temps passé,

*Cōseil salutaire de l'auteur pour Monsieur des Mains.*

*captiuans intellectum tuum in obsequium Christi,*  
 vous mettriez la main à bon escient à vostre conscience. *Primò*, pour considerer [comme vous avez fait autresfois] les mœurs & conditions mauuaises de celuy que Dieu a osté de ce monde pour estre la pierre de scandale qui en faisoit chopper infinis. *Secundò*, pour penser à la gravité & enormité du double parricide commis à Blois, & ce qui s'en est ensuiuy tant au temporel qu'au spirituel. *Tertiò* ( ce que vous touche de plus pres ) pour vous remettre deuant les yeux combien par conseil, approbation, applaudissement, conuiuece, omission ( outre les secours actuels de leurs moyens ) plusieurs Prelats ont griefuement offensé la bonté diuine, desquels estoit l'office, *instare opportune, importune, arguere, increpare, obsecrare in omni patientia & doctrina*, selon les occurrences, sans crainte de ceux qui *corpus possunt occidere, & posthac non habent amplius quid faciant : cum timere eum debuissent* ( comme instruiet le souverain maistre au texte Euangelique ) *qui postquam occiderit corpus, habet potestatem mittere in gehennam*. D'autant qu'il faut plus craindre celuy qui a la puissance sur les ames, que celuy qui ne peut oster que la vie corporelle : & vous y deuez penser par dessus tous autres, qui avez fait tant de pas pour ces commissions rongneuses, & qui avez diffamé, ou taché à diffamer, par lettres & par discours ( de quoy vous n'estes chiche ) & des compagnies honorables & beaucoup de gens de bien particuliers, iusques à vous attaquer au chef mesme

2. Timot. 4.

Luc. 12.

de l'Eglise & Vicaire de Iesus-Christ, tefmoin la lettre de dix ou douze fueillets enuoyee de Rome au Roy, du quinziesme de Mars dernier passé, de laquelle ie reserué la copie: tefmoin encore plus l'autre enuoyee au Cardinal que sçauiez, en laquelle auez fait ce beau iugement de Cosme, autrement nommé Anthoinette, pour le fait de Fremin Alexandre & Alexis, & de ce qu'il feroit ou ne feroit pas pour Innocent aduenant que les orangers fleurissent & en quel estage vous le logiez pour le premier & dernier article du Symbole, dont beaucoup de gens de bien ont esté fort scandalizez & ont admiré la patience & le cœur vrayment Chrestien à remettre les iniures particulieres, de celuy qui auoit grande occasion de s'en tenir offensé. *Quarto*, pour confesser non seulement l'acte commis à Blois estre meschant & execrable, mais aussi que tous ceux qui y ont participé & l'ont voulu deffendre, couvrir & pallier par leur prudence humaine & raisons d'estat, & ont mesprisé l'excommunication enuoyee par sa Sainteté, ont extremement delinqué: Ce que ie n'ay iamais ouy dire qu'ayez voulu recognoitre. *Quinto*, pour procurer avec tout soin, humilité & patience d'estre absouz par sa Sainteté de ce peché si grand, par vous commis en diuerfes circonstances, & de l'excommunication & irregularitez par vous encourues, puisque escriuez *vostre humeur & affection, vous tirer à seruir vostre troupeau*, car autrement n'estes vous pas receuable à vostre charge Episcopale. Et



consequemment ne deuez point estre honteux ou delicat à subir peines condignes, & faire vne bonne penitence, *ne in superbiam elatus in laqueū incidat diaboli.* Monsieur d'Auxerre duquel le crime n'est congneu si grand que le vostre, n'a point esté honteux d'enuoyer à Rome long temps y a pour cest effect, & y renuoyer derechef, n'ayant obtenu la premiere fois ce qu'il desiroit, comme i'entends auoir fait encores quelques autres de la mesme qualité.

Et quand il n'y auroit autre chose que les bruiçts & soupçons communs, vous n'ignorez l'axiome des Canonistes, qui enseigne que le Prestre ou Euesque qui est reputé excommunié est tenu de s'abstenir des fonctions de son estat pour euitier le scandale, & pour n'offencer sa conscience, ou celle d'autrui. *Si publica fama Episcopus vel clericus excommunicatus existimetur, tenetur abstinere propter vitandum scandalum, & ut seruiat conscientie, tum propria, tum aliena.* Et quād ores par quelques raisons vous voudriez pretendre n'auoir encouru les censures & excommunications, comme aucuns de vostre qualité debaten par ie ne scay quelles raisons friuolles, il vous plaira remettre deuant les yeux que *Deus non irridetur*, que Dieu ne se paye de distingos & fatras de raisons humaines, & penser qu'il s'agist du salut eternal, & que ce dire commun, *Fauores ampliandi pœnæ & odia restringenda*, n'a point de lieu en cest endroict, ains ce consentement des mesmes Canonistes, *In dubiis ubi versatur periculū animæ, semper tutior pars est eligenda.*

L'Euesque  
suspect d'ex-  
communica-  
tiō est obligé  
de se faire ab-  
soudre quād  
il n'y auroit  
que le simple  
soupçon.



En choses douteuses quād il y a du dāger de l'a-  
me, il faut tousiours choisir la plus seure partie.  
Il falloit auoir honte de commettre la faute,  
mais non pas de s'en repentir, car telle honte  
seroit damnable & diabolique. *Est confusio ad-*  
*ducens peccatum* (dit l'Ecclesiastique) & *est confu-*  
*sio adducens gratiam & gloriam*. Encores que les  
Courtisans, Politiques & mondains, & pour  
dire en vn mot les Atheistes se moquent de  
tels discours de Prescheurs, iamais vray Catho-  
lique ne s'en mocqua, & n'estima moins vn  
homme pour auoir fait penitence, scāchāt que  
c'est la planche qui nous sauue apres le naufra-  
ge, & que les Anges mesme s'en resionyssent se-  
lon le commun propos Euangelique. *Gaudium*  
*erit coram Angelis Dei super vno peccatore pœnitent-*  
*tiam agente*. Et pour vous dire ce que i'en pense,  
c'est icy le point, c'est la pierre de touche en la-  
quelle on peut faire preuue certaine des adhe-  
rās de feu Henry de Valois, pour discerner ceux  
qui ont quelque estincelle de religion, d'auec  
ceux qui n'en ont point, estāt chose toute claire  
que ceux qui perseuerent à iustifier son party, &  
mesprisent les Censures Ecclesiastiques, & ne  
s'en font que gossier ou secouër la teste au lieu  
de faire penitence, sont mis en sens reprouuē,  
sont sans religion & en estat d'eternelle damna-  
tion, tandis qu'ils demeurent tels. Ce que s'il  
vous plaist croire avec moy, & receuoir de telle  
affection & charité comme ie vous escriis (*ira-*  
*me Deus adiunet*) Dieu en sera glorifié, vostre cō-  
science purgée, vostre reputation restituee &

*Eccles. 4.*

*En quoy sōt  
discernex  
ceux des adhe-  
rans de feu  
Henry qui ont  
de la religion  
& ceux qui  
n'en ont point.*

*Affection  
Chrestienne  
de l'auteur.*

de moy ie commenceray à vous seruir & respec-  
ter & remettre en mes prieres ( quelque peu  
que cela vous puisse apporter ) autant que  
iamais.

Quant à la question de vostre missiue laquel-  
le sans correctiō, proposez d'un stile trop aigre,  
& autant defaillant en charité cōme excessif  
en desdain & mespris de nostre party, & abon-  
dant en scrupule & iactance de vostre zele &  
bonne conscience ( ce que n'est seant à vn per-  
sonnage de vostre qualité ) ie vous y satisferay  
du mieux qu'il me sera possible, attendant que  
d'une boutique mieux fournie que la mienne  
vous vous puissiez assortir de plus fines denrees  
& de tout ce que pourrez desirer à ce propos.

*Le premier et  
principal dou-  
te de mōsieur  
du Mans.*

Vostre doute principal ( qu'appellez *la di-  
spūte qui est sur le trotouer* ) quelque peu confusé-  
ment couché pour vn lourd esprit comme le  
mien, me semble consister en ce poinct, A sça-  
uoir si vous deuez recognoistre ( afin que i'vse  
de vos termes ) *le Roy de Nauarre*, pour Roy en  
France, & luy obeir ou non.

*On ne doit  
appeller le  
Biarnois, roy  
de Nauarre.*

En quoy ie trouue estrange d'entree, commēt  
vous qui semblez faire estat des censures & ex-  
communications, & qui pour le rang que tenez  
en l'Eglise, ne deuez où il y a de la consequence  
vser de termes mal propres & contreuens à  
l'vsage Ecclesiastique, auez qualifier Henry de  
Bourbon du tiltre & nom de Roy de Nauarre:  
Vous, dis-je, qui deuriez instruire le peuple à le  
priuer de ce nom, puis que l'ordonnance du Pa-  
pe present nous yastreinēt, laquelle vous sçauiez

auoie

auoir esté publiée à Rome l'an mil cinq cens  
oſtâte cinq le 9. de Septembre & puis enuoyee  
en France; mais par autorité royale de celuy  
qu'on a tant voulu crier Catholique, & par cō-  
niuence Episcopale, aussi tost supprimée. En la-  
quelle nous apprenōs à l'appeller iadis Roy de  
Nauarre, ou pretendu Roy de Nauarre, & non  
pas simplement, comme le vulgaire l'appelle,  
Roy de Nauarre.

Quāt à ce qui semble que le presuppofiez suc-  
cesſeur naturel & legitime au Royaume, enco-  
res le nieroyſ-je tout a faict, quād il seroit & en-  
fant legitime d'Anthoine de Bourbon & Ca-  
tholique, pour les raisons & pratiques de ce  
Royaume que i'ay apprises pour la plus part en  
auteurs diuers qui ont eſcrit du droit du Car-  
dinal de Bourbon a la couronne de France, que  
vous pouuez ſçauoir mieux que moy; lesquel-  
les ie ne veux icy inferer, pource que les liures  
ſont communs, & puis cela n'eſt à mon aduis le  
propos dont eſt queſtion. Que ſi comprenez  
ſon droit ſouz ceſt autre mot de voſtre lettre,  
[par autre vocation moins legitime] ie ne puis pas  
deuiner quel eſt ce droit, car il n'a pas le droit  
d'election, conſideré qu'en plains Eſtats où l'e-  
lection auroit deuë eſtre faicte, il en a eſté tota-  
lement excluſ & debouté. C'eſt donc vne ſuc-  
ceſſion ou election imaginaire fondee en la cer-  
uelle des Huguenots & Atheiſtes leurs adhe-  
rans, ou quelque autre eſpece de nominatiō ou  
introduction faicte par eux-meſmes, le voulans  
pour chef pour aſſouuir leurs ambiſiōs, accom-

*Héry de Bour-  
bon inhabile  
à ſucceder à  
la courōne de  
France.*



plir leurs vindiçtes, ruiner nos tēples de fonds en comble, rauager les villes, esteindre & exterminer du tout la Religion Catholique Apostolique & Romaine de ce Royaume, avec ce qui reste de liberté & commoditez aux gens de biē, fils ne trouuoient plus forts qu'eux pour empescher ces beaux desseings. Mais quand il auroit le plus apparent droit du monde, & mesme qu'il auroit esté Dauphin & fils aîné de France, si ne voudrions nous pas pour cela vser de vostre phrase que Dieu le nous eust donné pour Roy, consideré que l'heresie l'exclud & rend du tout incapable d'administratiō: & Dieu voudroit nous donnant de tels Princes, contre la sacree parole de l'Euangile, la destruction & desolation de son propre Royaume. Et est, sauf correction, encores vne consequence tresabsurde pour vn homme, *qui se dit auoir craincte de faillir*, Il est le plus proche du sang, *ergo* à luy appartient la courōne, puis que la parole de Dieu & exemples sacrez, puis que les loix & vuz du Royaume, puis que le sacre, les sermens & protestations qu'on y doit prester, apportent des exceptions & restrictions à cest antecedent, & demonstrent que quelque proche du sang que l'on puisse estre, l'on n'a aucun droit de dominer en France si la pieté & vraye religiō defaut. Dequoy nous trouuons comme vne figure, ou plustost preiugé au texte du Prophete Hieremie, quand il desista de qualifier Manasses du titre de Roy, pource qu'il estoit idolatre, mais l'appelle seulement fils du Roy Ezechias. Ains

*Le sang n'a  
bilité à la co-  
rōne si la re-  
ligion n'y est  
conioincte.*

*Hierem. 15.*



les Catholiques arguent au contraire, Il est loisible, voire necessaire (si on peut) de chasser vn Prince legitimemēt entré & ja estably au Royaume s'il tombe en heresie, & degenerate de la religion, il est donc loisible, à plus forte raison d'empescher vn heretique d'y entrer. Ioint que *turpius* [ie diray *difficilius*] *eijcitur quā non admittitur hospes*. Premieremēt vous ne pouuez ignorer estat le droict ciuil vostre professiō premiere, que par iceluy droict ciuil l'heresie ne soit vn crime public, & pourtāt les heretiques 2 criminels de leze Majesté diuine & humaine, mesmement 3 indignes d'estre appelez Chrestiens, & sont en tel estat qu'ils ne peuent 4 tester, ny 5 heriter, ains 6 leur biē doit estre cōfisque, 7 eux priuez de tout honneur & dignité, & 8 mesme (ja soit que vostre predication de Blois fut au contraire) punis de mort, comment donc leur seroit permise la souueraine puissance sur les corps & biens des Catholiques.

Dauantage, c'est chose toute euidente par la lecture des Histoires que les Empires & Royaumes, depuis qu'une fois ils ont receu la foy sont ordinairement allez en decadence quand ils sont tombez souz la domination des Princes heretiques, comme l'Empire des Romains sous les Empereurs Arriens, Constance & Valens, souz Anastase Eutrichien, & souz Iulian l'Apostat, & celuy des Grecs Orientaux, depuis que pour les differens des Images ils se sont separez del'Eglise Romaine: & au contraire ont flory souz les Princes Catholiques, comme souz

1. In nōnullis de lud.

2. Authent. Gazaros de heret.

3. l. damnato cod. de heret.

4. authent. de heret. collat.

10.

5. l. 26. c. de heret.

6. authent. Gazaros cod. de heret.

7. authent. coll.

8. de priuileg

8. l. Arriani cod. de heret.

Les Royaumes prospererent sous Rois Catholiques & vont en decadence sous heretiques.

Constantin le Grand, souz les deux Theodoses, Honorius, Otho premier, mesme souz Iustiniá premier & Heraclius, cependant qu'eux deux estoient Catholiques [car depuis qu'ils ont esté infectez d'heresie, la chance a esté tournée.] Et ce qui a fait si long temps durer ce Royaume, n'est autre chose qu'une speciale grace de Dieu, pour auoir les François si longuement & constamment perseueré en la vraye religion, lequel autrement, suiuant la Prophetie de nostre bon Patriarche saint Remy, doit prendre fin lors qu'il tombera en la puissance des Rois heretiques. Et ne iugez vous pas assez que tolerer en ce temps vn Roy heretique, est exposer la religion à vn peril trescuident, par la reigle *Regis ad exemplum totus componitur orbis*. L'exemple en est commun de Ieroboan, Manassé, Achab & autres Rois de l'ancien Testament, à l'imitation desquels la plus part des subiects sont tombez en idolatrie: Comme au contraire de Dauid, Ezechias, Iosias, & autres Rois pieux, à l'imitation desquels le peuple a esté pieux & a seruy au vray Dieu. Depuis la venue de Iesus-Christ du tēps de l'Empereur Constantin, la foy Chrestienne a flory, du temps de Constance *totus orbis* (comme parle saint Hierosme) *se Arrianum esse miratus est*, du temps du Iulian a esté remis le Paganisme. Et pour ne chercher exemple de temps & païs si eslongné, regnant nagueres en Angleterre Henry, & apres luy Edoüart l'Angleterre a abâdonné la religion Catholique, regnât la bonne Royne Marie par-apres a esté la

vraye religiō restablie: Estât le mesme Roiaume  
 tōbé entre les mains de ceste Iezabel qui le ty-  
 rannise à present, chacun voit l'estat auquel ce  
 miserable païs est reduit. Que pouuons nous  
 autre chose esperer du Biarnoïs, qui sanglotte  
 souuent la solennité de ses nopces, terminee le  
 iour saint Barthelemy, d'autre sens & d'autre  
 sang qu'il n'auoit desseigné, & de tous ses adhe-  
 rans Calvinistes, les plus cauteleux, superbes,  
 vindicatifs & cruels heretiques qui furent onc-  
 ques: Quoy qu'en apparece ils feignēt vouloir  
 estre instruits par vn Concile national, & vou-  
 loit au pis aller permettre, chacun viure en li-  
 berté de conscience, non seulemēt pour attirer  
 souz ce pretexte les idiots, mais encor plus pour  
 maintenir aucuns de la Noblesse & des Offi-  
 ciers pieça corrompus en leur Machiauelique  
 religion. Vous n'ignorez pas, comme ie croy, *But du Bian-*  
 comment ce Biarnoïs en la lettre qu'il escriuoit *noïs.*  
 aux Seigneurs de Berne (qui a esté surprins par  
 diuine permission) apres auoir demonstré la *Henry de Va-*  
 grande ioye qu'il a de la mort de son vieil enne- *lois est reputé*  
 my par force reconcilié, Henry de Valois, de- *ennemy par,*  
 clare que pour ne perdre vne bonne partie de *le Biarnoïs.*  
 l'armee & n'aliener le cœur du peuple endurcy  
 (ce sont ses mots) aux erreurs de sa vieille reli- *Comment il*  
 gion, a esté contrainct par l'aduis des plus sages *se faut fier à*  
 & affectionnez de son conseil publier ceste de- *la declaratiō*  
 claracion, par laquelle il iure & promet la con- *faicte par le*  
 seruation de la foy Romaine, nonobstant qu'il *Biarnoïs.*  
 espere par-apres rendre bon tesmoignage de sa  
 deuotion immuable à l'Euangile & à la gloire



de l'Eternel. On voit combien a cousté à l'Angleterre d'auoir creu à telles dissimulations de ladicte Iesabel en son entree, & est vn traitt ordinaire à l'heretique de n'egratigner quand il a les ongles rōgnees: mais quād elles sont creuës s'en garde qui pourra, *Sauire vos nolle dicitis*, dict saint Augustin, *Ego non posse arbitror, &c.*

*Epist. 48.*

*cap. Gaudemus extra de  
dinortius.  
1. Cor. 7.*

Mais pourquoy, ie vous prie à vn peuple Catholique ne sera-il permis secouer le ioug d'un Roy heretique, taschāt a attirer le peuple à son heresie, puis qu'il est permis à vne femme fidele se separer de son mary infidele, quand il tasche à la peruerter & faire apostasier de la foy? Cōme deduiet fort bien Innocent 3. du texte de saint paul aux Corinthiens: Car la puissance n'est pas moindre, ains plus grande du mary à l'endroit de la femme, que du Roy à l'endroit des subiects.

*Nō sommes  
obligez en cō  
science de re-  
ietter le ioug  
de l'hereti-  
que.*

Je dis plus, que non seulement il est permis, mais aussi qu'il est necessaire, & que nous sommes obligez en conscience de reietter du tout l'heretique de la principauté ou Royaume, puis que de droit diuin nous sōmes obligez à garder la vraye foy & religion qui n'est qu'une, & n'est que de droit humain d'auoir cestuy-cy ou cestuy-là pour Roy.

Ne pouuons nous pas iustement requerir à quiconque veut pretendre droit en ce Royaume qu'il s'oblige à Dieu & à nous, de pareil serment qu'ont fait les predecesseurs, à faute dequoy aussi iustement le pouuons reietter?

A sçauoir si le Biarinois iurera de viure &

*Les Rois sont  
obligez en  
Frâce de pre-  
ster & gar-  
der les sermēs  
ordinaires.*



mourir en la Religión Catholique, Apostolique & Romaine, promouuoir l'aduancement & conseruation d'icelle, employer de bonne foy toutes ses forces & moyens, sans esparigner sa propre vie pour extirper de ce Royaume tous schismes & heresies condamnées par les saincts Cōciles, & principalemēt par celuy de Trente, selon que fraichement encores (& pleut à Dieu que par tous dedans le cœur aussi saintement que feinctement) a esté conclud & posé pour loy fondamentale & irreuocable en plaine assemblee d'estats ? ou s'il le iure, à sçauoir s'il le tiendra ? le n'en veux autre iuge que vous, Monsieur, qui auez auec les autres recongneu, approuué & iuré ceste loy fondamentale. Et quāt & quāt vous ramentenez s'il vous plaist, que tous Princes, Seigneurs, Ecclesiastiques, Gētilshommes & autres sont adstraincts par mesme serment (principalement & expressement ceux qui lors estoient à Blois) d'employer toutes leurs forces & moyens iusques à leur propre vie pour l'extermination desdits heretiques : & particulièrement vous souuiendrez auoir iuré de ne receuoir à estre Roy ny prestet obeissance à prince quelconque qui soit heretique ou fauteur d'heresie.

Vous dictes, *ce serment trouble ma conscience*, ie ne sçay si vous en repentez, mais ie n'ouy iamais dire qu'homme de bien se repentit d'auoir bien fait. De retirer le pied d'un mauuais pas, de reuoker vne chose mal promise, de rompre vne foy mal iuree, ce n'est chose reprehensible,

Quelle foy  
doit estre gar  
dee & quelle  
non.

ains qui se doit faire, *in malo promissis rescinde fidē.* Phœbus feit tresmal, disent les prophanes, quād il garda sa promesse à Phaëton, luy baillant le chariot du soleil a gouuerner. Neptune quād il garda sa promesse à Theseus touchant la mort d'Hypolite, Herodes [disent les Theologiens] quand il garda le serment faict à Herodias, dōt ensuiuit la mort de saint Iean Baptiste. Mais quand vn Chrestien, principalement vn Prelat Ecclesiastique faict serment de procurer l'honneur de Dieu, l'auancement de la vraye religiō, de s'opposer à la reception d'un Roy heretique, ie ne trouue occasion au mōde pourquoy il puisse ou doiuue retracter: veu que, par vostre tesmoignage mesme, la religion & ce fonnement doit estre le principal en nos actions & conseils.

Voire mais, dictes vous, ny le *vieil Testament*, ny l'*Histoire Ecclesiastique* ne nous apprend point le peuple de Dieu s'estre oppose par armes à l'establissement des Rois, Empereurs ou Princes, qui par succession ou autre vocation peut estre moins legitime, venoient au Royaume ou Empire, iacoit qu'ils fussent Idolatres, Payens ou Heretiques. Et la mansuetude Chrestienne semble vouloir que nous attendions de Dieu ce qui luy plaira ordonner sans nous penser plus sages & opposer par force à ses volonte: Paroles [pardonnez moy] qui rescent pluſtoſt le ſtyle d'un ministre de la Synagogue de Sathan que d'un Eueſque de l'Eglise de Dieu: desquelles quelque vn de vostre plus ancienne congnoissance, entendant nagueres la lecture nous interrompit d'une parenthese disant, le mortier sent tousiours  
les

les aux, dont ie fus marry.

Bien est vray que vous adioustez *que ie sçache*, Exemples du  
laquelle exception a apparence de modestie, *vieil Testa-  
ment de ceux  
qui se sont op-  
posés iuste-  
ment à leurs  
Rois à cause  
de la religio.*  
mais en effect on ne peut pas aisément croire  
qu'un homme si versé que vous ne sçache quel-  
ques exemples du vieil Testament & de l'Hi-  
stoire Ecclesiastique à ce propos & puis que  
voulez qu'on vous en cotte quelque'un au  
vieil Testament, Au premier liure des Rois il  
apert Dauid auoir porté les armes contre Saül  
Roy legitiment institué, pour sa tyrannie &  
impieté, dequoy a porté tesmoignage Abigail,  
laquelle diuinemēt inspiree, disoit à Dauid qu'il  
batailloit les batailles de Dieu, *Pralia Domini  
Domine mi, tu praliaris.* Au troisieme liure des  
Rois on lit comme Salomon fils de Dauid es-  
toit Roy legitime, & neantmoins apres qu'il  
est tombé en idolatrie & impieté, Ieroboam  
l'un de ses plus chers seruiteurs & principaux  
officiers la laissé, & s'est rebellé contre luy: Ce  
qui appert auoir esté sans offenser Dieu, par les  
promesses que Dieu luy faiët sur la fin de l'on-  
zieme chapitre: & de faiët les Tribus de Iuda  
& de Benjamin vouläs venger quelque temps  
apres, ceste departie d'auec Salomon, Dieu leur  
deffendit & commanda qu'ils s'en retournas-  
sent chez eux, & qu'il auoit meü Ieroboam à ce  
faire. *Non ascenderis*, disoit-il, *neque bellaberis ad-  
uersus fratres vestros filios Israel, reuertatur unus-  
quisque in domum suam, à me enim factum est ver-  
bum hoc.* Au second de Paralipomenon, les Idu-  
means & habitans de Lobna se sont rebellez

1. Reg. 25.

3. Reg. 11.

2. Paral. 21.



1. Mach. 2.

cōtre leur Roy Iorā, pour ce qu'il auoit delaiſſé le vray Dieu, auoit baſty des idoles & fait idolatrer les Iuiſ, *Dereliquerit enim Dominum Deum patrum ſuorū & excelsa fabricatus eſt, & fecit praeſuaricari Iudam.* Au premier liure des Machabees l'hiſtoire du preux Mathathias eſt euidente, cōment conſiderant l'impieté d'Antiochus, print vne braue reſolutiō de ne point obeir à ce meſchant Roy, meſme tua celuy qu'il auoit enuoïé pour contraindre d'immoler aux idoles, & faiſant vne ſaincte Ligue, cria hautement par la ville, que ceux qui auroient zele à la vraye religion fortiſſent apres luy. *Omnis qui Zelum habet, legis ſtatuens teſtamentum, exeat poſt me.* Ce qui fut continué encores apres ſa mort par ſes enfans.

1. Reg. 15.

Quand Samuel a fait entendre à Saül au premier liure des Rois, que pour auoir pardonné au Roy Amalechite Agag & meſpriſé la parole de Dieu il eſtoit deiecté & degradé du Royaume, ne penſez vous pas que ce fut vn preiugé d'vne pareille peine à ceux qui tenans le ſceptre non ſeulement pardonnet aux Rois heretiques, mais ſont heretiques eux-meſmes? & encores vn preiugé pour deiecter tels Rois par l'autorité publique hors de leurs troſnes.

Num. 25.

Quand Dieu a commandé au liure des Nōbres qu'on priſt tous les Princes du peuple & qu'on les pendift aux gibbets contre le ſoleil, pour ce qu'ils eſtoient cauſe de l'idolatrie du peuple, ne penſez vous pas que ce commandement fut de conſequence pour les Princes qui paraprés tombéroient en la meſme faute?



Et de fait Dieu auoit tant en horreur en l'ancienne loy les Rois d'autre religion, qu'il disoit expressement, *Non poteris alterius gentis hominem Deut. 17. regem facere, qui non sit frater tuus*, c'est à dire, de mesme religion non de fraternité charnelle. Et *Deut. 13.* le Roy mesme estoit obligé de prendre le Deuteronomie de la loy de la main des Leuites ordonnez & cōsacrez. Et n'estoit loisible au peuple de prendre Roy qui ne se fut assubiecty à ses conditions.

Dauantage, puis que Dieu commandoit qu'on meit à mort les faux Prophetes, comment eust-ce esté la volonté qu'un faux Prophete regnast?

Et quant à ce que l'on trouue des Rois auoir esté quelque fois receuz du peuple, encorés que ils fussent idolatres. Premièrement l'on doit considerer que tels Rois n'ont jamais esté paisibles, outre ce que c'estoit vne particuliere tollerance de Dieu pour la promesse faicte à Dauid. Secondement on peut auoir ensemble remarqué, comment en consequence de ce, le peuple de Dieu a esté ordinairement chastié & reduict en captiuité & miseres extremes par la diuine volonté. D'où s'ensuit que le peuple de Dieu au vieil Testament s'est opposé par armes à tels Princes idolatres, & a offensé Dieu toutesfois & quantes qu'il ne s'est opposé à leur establissement.

*Respōse aux  
exemples des  
Rois idolatres  
receus du  
peuple.*

Quant à l'Histoire Ecclesiastique elle nous apprend que les Chrestiens Armeniens se sont opposez par armes à l'Empereur Maximin idole-  
*Exemples de  
l'histoire Ec-  
clesiastique  
de ne suppor-  
ter les Rois  
heretiques.*

*Euseb. lib. 9.  
cap. 8.*

latre, tesmoing Eusebe : que Adauctus feit ab-  
batre les idoles & faire professiō de foy au peu-  
ple contre le commandement de l'Empereur  
Diocletian en son gouuernement de Phrygie:  
qu'un bon bourgeois à Nicomedie meit en  
pieces & ietta souz ses pieds les lettres du mes-  
me Empereur enuoyee contre les Chrestiens:  
que Valentinian premier, qui depuis a esté tres-  
Chrestien Empereur, a donné sur la iouë à vn  
Sacrificateur qui luy iettoit de l'eauë de leur su-  
perstitieuse aspersiō en la presence de Iulian  
l'Empereur : que infinies fois pour la deffense  
de leurs Euesques, les Chrestiens se sont oppo-  
sez par armes à l'impietē de leurs Princes, tes-  
moings les sainctes Peres & Historiens : Que  
l'Empereur Basile heretique Eutichien, a esté  
par Zenon iustement priuē de son Empire, &  
depuis est mort en vn chasteau avec quelques  
siens mignons, tesmoing Zonare : & comme  
par-apres Zenon son successeur estant infectē  
de la mesme heresie, & neātmōins ayant publié  
son Henothicō, c'est à dire, Edict d'Vnion tant  
celebrē, feignant de vouloir bien aux Catholi-  
ques fut porté & enseuely tout vif dedans vn  
sepulchre par le commandement mesme de sa  
femme Ariadnē. Il est aussi rapportē de l'Empe-  
reur Anastase, lequel pour estre Manicheen es-  
toit publicquemēt criē indigne de l'Empire par  
la voix du peuple, qui l'eust depōsé tout a fait,  
comme il est probable, si par vn foudre du ciel  
qui preuint, s'auie n'eut terminee. Aussi l'Empe-  
reur Philippes pour estre ennemy des images

fut deietté de son Empire par les Chrestiens, qui mesmes osterent son nom & sa memoire des actes publics, des monnoyes, & du saint Canon de la Messe. Pareillement se sont opposez les Chrestiens à Leon Empereur aussi Yconomaque, & à son fils Copronyme & à plusieurs autres qui se sont bandez contre l'Eglise & religion Catholique. Et tant s'en faut qu'il leur fut reproché qu'ils feissent contre la mansuetude Chrestienne, ou qu'ils s'opposassent par force aux diuines volontez, comme vous semblez reprocher aux Catholiques que ce eut esté vne douceur Machiauelique & pusillanimité par trop reprehensible deuant Dieu & les hommes, s'ils en eussent fait autrement.

La mansuetude Chrestienne, dictes vous, semble vouloir que nous attendions de Dieu ce qu'il luy plaira ordonner, sans nous penser estre plus sages & opposer par force à ses volontez. Si ainsi est, il ne faut iamais resister aux ennemis qui nous font la guerre, puisqu'il plaist à Dieu pour nos pechez en ordonner ainsi. Si ainsi est, les Manicheens ont eu bon droict de dire qu'il n'estoit loisible de faire la guerre, & que Moïse, Iosué, Dauid & les autres Peres de l'ancien Testament faisant la guerre ont offensé Dieu, & saint Augustin a eu tort de les reprendre. Si ainsi est, vn Agrippa, vn Erasme, vn Oecolampade, des Anabaptistes & autres, disans que la guerre est de soy vn mal, qui a esté par la diuine permission toleré aux Iuifs, mais totalement deffendu aux Chrestiens, auroient eu raison, & l'Eglise auroit auioirdhuy

*A sçauoir se  
c'est contre la  
mansuetude  
Chrestienne de  
resister à vn  
heretique.*

*Aug. lib. 22.  
cōtra Faustū  
cap. 74. &  
seq.*



tort de les reprédré, & le texte sacré d'approuuer  
souuentefois la guerre. Ou pour le moins si te-  
nez que la guerre soit chose licite, vous voulez  
neantmoins tōber en l'opiniō de Luther, lequel  
encore qu'il tinst & estimast la guerre n'estre  
illicite de soy, si tenoit il qu'il n'estoit loisible  
aux Chrestiens de faire la guerre & se defendre  
contre le Turc, allegant vostre mesme raison  
pour son Achilles, A sçauoir que puis que c'e-  
stoit la volonté de Dieu, que nous fussions pu-  
nis par le Turc, comme par vn fleau, il nous fal-  
loit receuoir ce qu'il luy plaisoit ordonner, &  
ne point resister à sa volonté. Laquelle raison est  
euidemment captieuse & totalement nulle. Car  
combié que ce soit la volonté de Dieu que nos  
pechez soiēt punis par les Turcs & heretiques:  
toutesfois ce n'est pas la volonté de Dieu que  
nous ne resistions pas aux Turcs & heretiques,  
ains sa volonté est que nous leur resistions; cō-  
me on peut aisément cognoistre par la fin & in-  
tention de nostre Dieu: d'autāt qu'il ne permet  
pas les Turcs nous affliger afin que nous peris-  
sions, mais afin que nous nous conuertissions:  
ce qui se fait quand nous trauaillons à resister  
contre le Turc, en trauaillant nous recognois-  
sons nostre infirmité, la recognoissant nous no<sup>s</sup>  
conuertissons à Dieu & implorons son ayde.  
Dauantage, si pour estre vn fleau de Dieu, &  
estre sa volonté que soyons affligés, nous ne de-  
uions resister au Turc ou heretique: à mesme  
raison il faudroit endürer la faim & ne point la-  
bourer la terre, il ne faudroit chercher des re-



medes contre la peste ou autres maladies & aduersitez, pour ce que ce sont fieux de Dieu. Qui est chose ridicule à inferer. Aussi a esté cestuy-cy le trentequatriesme article erronnee de Luther iadiscondané en la Bulle du Pape Leõ. Auquel erreur chopent ordinairement les heretiques, principalement quand ils se sentent foibles, & tournoient encore au tour du pot en ceste matiere les tiedes & peu resolus Catholiques: & (pour dire rondement ce que i'en pense) ceux qui voudroient que l'heresie eust le dessus, mais par vne humaine & politique discretion ne l'ausent encore appertement dire. Pentens ceux qui sont opiniaistres en telles propositions.

Mais les premiers Chrestiens ne se sont opposez (voulez vous dire) à vn Neron, à vn Domitian, Diocletian, Constans & Vallens, Iulian, Heraclius & autres idolatres & heretiques. Je vous respons avec saint Augustin conformement au traict vulgaire, *distingue tempora & concordabis scripturas*, que aux premiers temps du Christianisme ne s'accõplissoit encores la Prophetie du Pseaume 2. *Et nũc reges intelligite, erudimini qui iudicatis terram, seruite Domino in timore, &c.* Mais la premiere partie du mesme Psaume, *Asisterũt reges terra, & principes conuenerũt in unum aduersus Dominum & aduersus Christũ eius.* Car les Chrestiens n'estans lors en grand nombre, ny assez puissans pour resister à tels Princes, principalemẽt n'ayãt chef d'entr'eux qui peust

*Respose aux  
argumẽs pris  
de l'Histoire  
Ecclesiastiq.*

*Epist. 48.*

conduire leur entreprise estoient contraincts de faire ioug, & au lieu de resister, s'offrir libremēt au martyre, comme ils faisoient. Mais depuis que la Chrestienté a esté multipliee & a commencé à resider (en la personne de Constantin) au trosne Imperial, tout aussi tost les Chrestiens ont peu dire des Empereurs & Rois idolatres ou heretiques, *Disrumpamus vincula eorum, & proyiciamus à nobis iugum ipsorum*. Et tousiours cōtinué de mesme, si ce n'a esté quand souz le regne d'aucuns, principalement renards & hypocrites, leurs forces ont esté par subtils moyes & feintise de pieté tellemēt affoiblies qu'ils n'ot eu aucun moyen de resister. Mais ce n'est pas que pour cela ils n'eussent eu droit, voire obligation de resister, si leurs forces eussent esté bastantes, aussi bien qu'au vieil Testamēt les Prestres auoient droit, voire commandement de chasser les lepreux du Temple, comme Azarias chassa le Roy Ozias qui estoit vne figure de ce qui deuoit estre obserué en la loy Euangelique.

1. Cor. 6.  
| Raisōs tirees  
du nouueau  
Testament.

Qu'ainsi ne soit, vous sçavez que saint Paul de son temps exhortoit les Corinthiens a constituer des Iuges nouueaux d'entr'eux qui fussent Chrestiens, pour decider leurs procez & & differens qui suruenoient pour le ciuil & choses tēporelles, sans qu'ils fussent cōtraincts d'aller plaider deuant des Iuges infideles & persecuteurs du Christianisme. Que s'ils eussent eu des Euesques & Prelats, des Iuges, vne Noblesse, vn peuple Catholique, & pour dire en vn mot, s'ils eussent eu assez de force pour se creer  
&

& eslire des Rois ou Empereurs Chrestiens; il ne faut douter que saint Paul ne les eut pareillement excitez à ce faire, iagoit qu'auparavant il n'y en eut point eu de Chrestiens, cōme aussi il n'y auoit auparauant eu de Iuges sinon infideles ou idolatres, au moins pas vn Chrestien. Je vous demanderois volontiers quand saint Iean nous deffend de receuoir celuy qui apporte autre doctrine que la vraye & Catholique, & mesme de le saluër *ne aue ei dixeritis*, sur peine d'estre reputé participant de sa meschanceté, *qui enim dicit illi aue, communicat operibus eius malignis*, s'il entend seulement des simples & mediocres ou bien de tous en general? Certainement il n'y a aucune exception ny acception de personnes, quand on le peut obseruer. Que si la doctrine Apostolique veut que les Chrestiens n'ayent aucune accointance avec l'heretique, quel qu'il soit, mesmes iusques à ne luy donner le bon iour, qui est le moindre office de la vie ciuile, comment sera-il loisible que le Chrestien se soumette à l'obeissance de celuy qui veut establir l'heresie tout a fait, qui luy porte respect, luy rende honneur, prenne de luy les loix & le recongnoissent comme souuerain? Ne scauez vous pas encore, comme en saint Matthieu nostre Seigneur nous instruit de tenir comme Ethnique & Publicain (ainsi parloit il selon les termes vſitez entre les Iuifs) celuy qui ne voudroit obeir à l'Eglise? *Si Ecclesiam non audierit, sis tibi tanquam Ethnicus & publicanus.* Matth. 18.

Or est-il ainsi que les Iuifs selon leur loy; ne re-



~~neusont~~  
 comment iamais pour superieur, & n'admettoies  
 à aucun Magistrat celuy qui estoit Ethnique ou  
 Publicain, ou d'autre religion que la leur, ains  
 s'y opposoient par tous moyens & s'estimoient  
 polluz de la conuersatiō d'un tel homme. C'est  
 donc signe euident, ains argument necessaire,  
 que nous ne deuons frequenter ny reconnoi-  
 stre aucunement ceux qui ne veulent obeir à  
 l'Eglise, comme font tous heretiques, sur peine  
 de contreuenir à la diuine volōté. Bref on voit  
 par le cours commun de l'histoire, & le sçauiez  
 trop mieux que moy, que & au vieil Testament  
 & depuis la promulgation de la loy Euangeli-  
 que iusques à present, les Chrestiens se sont op-  
 posez par armes aux Princes idolatres & here-  
 tiques, toutesfois & quantes qu'ils en ont eu le  
 moyen. Et sur toutes les nations qui furent on-  
 ques, les vrais François, ie dis les vrais & non  
 abastardis ou desnaturez, sont tellement accou-  
 stumez à Rois Catholiques (n'en ayans point  
 eu d'autres depuis onze cens ans) qu'ils n'ont  
 veine qui tende à receuoir aucun pour Prince  
 qui ne soit Catholique. Et vous-mesmes, Mon-  
 sieur, quel creue-cœur vous seroit-ce d'auoir  
 aujourd'huy vn Roy, lequel entrant en vostre  
 Eglise seriez contrainct de laisser imparfaits les  
 sacrez mysteres? Voire de sortir de l'Eglise tout  
 a fait pour ne participer avec luy? Prince du-  
 quel n'ausassiez mettre le nom au Canon de la  
 sainte Messe? Prince qui ne vous pourroit re-  
 spondre *amen*? Prince qui se moqueroit de vos  
 ceremonies, prieres & benedictions, & mesmes



qui se gosseroit du vray Dieu que vous adorez?  
 Et partant ie m'estonne fort comme tardez si  
 long temps à vous resoudre (ie dis long temps,  
 pour ce que de ma cognoissance il y a plus de  
 cinq ans, que à ce mesme propos vn de vos plus  
 intimes, vous dict que les heteriques auoient  
 assez d'Aduocats sans que les Euesques s'en mes-  
 lassent & s'en feissent les protecteurs) n'y ayant  
 si grande difficulté que vous dictes, & veu que  
 vous-mesmes mettez des raisons à vos lettres  
 pour le party de la verité, qui ont plus de poids,  
 sans comparaison, & emportent de beaucoup  
 les autres en la balance du iugement Catholi-  
 que & de la raison humaine, iacoit qu'elles soient  
 couchees en telle sorte qu'elles ne semblent  
 par vous alleguees sinõ par maniere d'acquiẽt.  
*Deus meliora.*

Quant à ce que vous dictes *que ceux de la Li-  
 que ont couronné leur œuvre par vn parricide detesta-  
 ble.* Ie ne puis laisser passer ce mot que ie n'en  
 die mon aduis. Ie tiens que iamais homme n'a  
 vsé de ces termes qu'il n'ait esté outré de pas-  
 sion, pour auoir perdu esperance de quelque  
 commodité temporelle qu'il pretendoit du de-  
 funct, aux despens des bons Catholiques de ce  
 Royaume. Et pour dire en vn mot qui ne soit  
 ou du tout meschant & corrompu, ou du tout  
 en ceste consideration ignorant & auenglé. Car  
 en premier lieu vous attribuez ce faict à ceux  
 de l'Vnion, c'est à dire, à plusieurs, qui ne se peut  
 attribuer quant aux hommes, sinon à vn seul

*Le faict du  
 Iacobin.*

Deutor. 31.

personnage. Et quelque recherche qu'ayei peu  
 & puissent faire cy apres les Accaronites, Cour-  
 tisans & Regalistes, ils n'ont trouué & ne trou-  
 ueront iamais qu'homme du monde ait coo-  
 peré par aduis, conseil, suasion ou autrement à  
 la cheute de leur idole, & ie puis hardiment dire  
 comme Moïse, *Dominus solus dixit eius fuit, & nō*  
*erat cum eo Deus alienus*, Le Seigneur seul a esté  
 son guide, & avec luy n'estoit point de Dieu e-  
 stranger. Duquel si vous demandez la vie & de-  
 portemens, ie vous puis asseurer pour l'infor-  
 mation authentique, que i'ay veuë accompa-  
 gnee de plusieurs signatures manuelles de gens  
 dignes de foy, qu'il auoit tousiours vescu en hō-  
 me de bien & bon Religieux, mediocrement  
 docte, mais simple deuot & zélé, quoy qu'en  
 ait presché à Tours vn plus docte de son ordre,  
 mais moins homme de bien que luy. A sçauoir  
 celuy lequel n'est pas moins congneu par les  
 brelandiers & autres gens de note plus infame  
 [que la reuerence de nostre professiō & la siēce  
 aussi vostre respect m'empeschent de nommer]  
 que par les auditeurs qui ont assisté à ses predi-  
 cations, quelque nombre qu'ils soient; Ses ha-  
 bits, ses paroles, ses deportemens l'ont fait trop  
 congnoistre: estant celuy mesmes qui a faict ba-  
 stir ceste belle maison aux Iacobins de Paris  
 dont les ouuriers sont encore à payer: celuy-là  
 mesme, que voulut auoir pour confesseur sans  
 en auoir trouué autre à son gré ceste bonne Ca-  
 tholique qui estoit lors vostre voisine Madame  
 de Cani, dont vous vous estes tant de fois

plainct, iusques à tenir l'Eglise pour pollué où fut enterré le corps de ladite Dame, nonobstâr la relation de ce bon frere : Celuy-là mesmes qui suppliât à la faculté de Theologie & ayant esté refusé pour les rapports qui se faisoient de ses mœurs, & de la doctrine par luy preschée, a eu cest honneur d'y estre introduict par arrest ( si i'ose noter telle presumption & irreligion en ceux qui fauorisent de leurs arrests telle sorte de gens, ou telle pusillanimité en nostre corps) comme par arrest a aussi presché son second Carême à la paroisse saint Eustache cōtre la volonté de plusieurs gens de bien: Et depuis encores par menées Cardinalesques & absolue volonté de ce bon Henry dernier mort vn Carême à Amiens, contre la volonté des habitans qui l'auoient pour suspect, & fructifie encore aujourdhuy selon la qualiré de l'arbre aupres ce saint & notable Parlement & cōseil de Tours. Dieu luy face la grace qu'vn iour en sincerité & vray remords de conscience il puisse dire comme a fait long temps y a vn autre de son país. *Ego Berengarius. &c.*

Doutez vous quelle occasion a meu frere Iaques Clement à vne si haute entreprinse? Le tiés considerant le rapport de ceux qui le congnoissoient dedans & dehors, qui l'ont ouy discourir sur ce poinct, ne croyans pas toutesfois que ceste entreprinse deurt réüssir, que rien autre chose que le zele eschauffé de l'esprit de Dieu ne l'a esmeu ou poullé à ce faire & conduict iusques au dernier poinct, selon qu'il l'auoit



Psal. 37.

pourpensé & particulièrement deduit à aucuns qui se moquoient de ses discours. Ce qui se cognoist en ce que plusieurs fois *in mentis excessu*, il a eu ce mouuement, *vsquequo Deus improperabit inimicus irritat aduersarius nomen tuum in fine?*

Psal. 138.

O Dieu iusques à quant fera nostre ennemy les reproches? l'aduerfaire blasmera. il vostre saint nom à iamais? En ce que cōmettāt cest affaire à Dieu luy disoit, *Nonne qui oderunt te Domine oderā & super inimicos tuos tabescebā, perfectō odio oderam illos, inimici facti sunt mihi: proba me Deus, & scito cor meum: interroga me, & cognosce semitas meas, & vide si via iniquitatis in me est, & deduc me in via aterna.* N'ay-ie point hay Seigneur ceux qui vo<sup>z</sup> hayssioēt, & ne dessechois-ie pas de tristesse cōtre vos ennemis? Je les hayssois de haine parfaite & les ay tenus pour ennemis. O Dieu esprouuez moy & congnoissez mō cœur, sondez moy & prenez congnoissance de mes sentiers. Et sur tout voyez si ie suis au chemin d'iniquité, & en fin me conduisez en la vie eternelle. Et faisoit autres prieres equiuallentes, comme pourrez voir celle qui m'est tombee entre mes mains, de laquelle i'ay esté contāt de vous faire part apres la conclusion des presentes, mesmes a esté soigneux, comme il a fait entendre à ses plus intimes, de se conseiller à gens de plus grāde sciēce & conscience qu'il pouuoit aduiser. Desquels apres vn meur & saintement premedité consentement eut ceste benediction, *Tribuat tibi Dominus secundum cor tuum, & omne consiliū tuum confirmet.* Que Dieu te donne le desir de tō ame

Psal. 19.



& vucille par sa grace cōduire à bonne fin toutes tes entreprinſes. Sur quoy la reſolutiō priſe, & ayant medité ces mots du Pſalmiſte, *Dominus illuminatio mea, & ſalus mea quem timebo? Si conſiſtant aduerſum me caſtra, non timebit cor meum. Vñ peſij à Domino hanc requiram, ut inhabitem in domo Domini omnibus diebus vita mea.* Le Seigneur eſtant ma lumiere & mon ſalut de qui auray-je crainte? Quand toutes les armées ſeroiēt bandees contre moy, mon cœur n'en ſera point eſtonné. L'ay fait vne ſeule demāde à Dieu que ie requerray encores, c'eſt que ie puiſſe demeurer en ſa maiſon tous les iours de ma vie, Se diſpoſa de partir de Paris, & ayant pourueu encores aux moyens humains, pour ſon entree vers le Tyran & l'exécution de ſon haut deſſeing, dit à vn ſien amy Bachelier, luy deſcouurant ſon voyage, la ſubſtance de ces paroles de Dauid. *Perſequar inimicos meos & comprehendam illos, & non conuertar donec deſciant: confringam illos nec poterunt ſtare.* Ie pourſuiuray mes ennemis & les attraperay, & ne retourneray point qu'ils ne ſoient deſconfits, ie les froiſſeray & ne ſe pourront iamais remettre ſur pieds. Et tant s'en faut qu'il en pretendiſt quelque recompenſe humaine, qu'il ſe tenoit tout reſolu d'y mourir, & meſmes a eſté de luy rapporté ce mor, que s'il eut penſé en rechapper il ne l'eut iamais entrepris craignant qu'il n'en eut de la gloire ou autre recompenſe humaine, qui l'eut peu faire oublier Dieu & mettre empeschement à ſon ſalut: & parlant du loyer qu'il en pretendoit,

Psal. 1.

disoit par la sainte inspiration. *Et retribuet mihi Dominus secundum iustitiam meam.* Et Dieu me retribuera selon la iustice de ma cause, & me remunerera selon l'innocence de mes œuvres. Et pour fin *in pace in idipsum*, disoit-il, *dormiam & requiescam.* Je dormiray & reposeray en ce faict mesme en repos eternal.

Psal. 4.

Le malin esprit n'a peu pousser F. la ques Clemēt à ceste entre-prise.

Quant à ceux qui attribuent ce coup à vn desespoir, & disent qu'il a esté poussé d'un esprit malin, ie les trouue semblables à ceux qui disoient de nostre Seigneur, *in Belzebuth principe dameniorum eijcit damonia*, auxquels nostre Seigneur respondoit (comme nous leurs pouons aussi respondre) que le diable vouldroit la ruine de son Royaume & de soy-mesme: ce qui est absurde.

Comment est loiable ce faict pour estre accōpagné de vertus morales. Et Chrestiens.

Si vous me demandez donc est-ce pas cela tenter Dieu? ie vous responds que c'est obeir à Dieu & à l'inspiration sainte. Si vous me demandez, est-ce pas vne outrecuidance & temerité? ie vous responds a parler moralement que c'est vne vertu de force & magnanimité s'il y en eut onques: laquelle consiste selon Aristote en ses Ethiques à entreprendre avec discretion & iugemēt choses hautes & ardues pour quelque bonne & notable fin, sans s'espouuanter des inconueniens qui en peuuent aduenir, non pas de la mort mesmes: A parler Chrestienne-ment que c'est vne action en nostre siecle d'incomparable charité. Car on ne peut auoir charité plus grande (dit la bouche sacree de Iesus-Christ) que d'exposer sa vie pour ses amis, *ma-*

*iorem charitatem nemo habet quàm ut animam suam*  
*ponat quis pro amicis suis :* Et encores vne force  
 Chrestienne, *quæ suritur & fititur iustitia*, la-  
 quelle giste en appetit & soif de iustice, comme  
 disent saint Augustin & saint Bernard, par la-  
 quelle les Apostres, *in occisione gladij mortui sunt*,  
 ont esté occis du cousteau: & qui adiouste à la  
 morale susdicte vne consolation prouenant  
 du secours diuin, & la consideration supernatu-  
 rellement enuoyee de l'augmentation de la  
 gloire de Dieu. Et quant à moy ie confesse li-  
 brement ne sçauoir que cest que le don du saint  
 Esprit, appellé par Esaie & par l'Eglise, *donum* *Esa. II.*  
*fortitudinis*, Le don de force, si ce n'est l'amas des  
 circonstances qui se retrouuent au faict du Ia-  
 cobin: sur lequel ie ne me puis tenir de consi-  
 derer souuent ce miraculeux changement, cō-  
 mēt d'un naturel, doux, lent & timide, (Comme  
 il estoit de bas lieu & de peu d'experience) il  
 est venu en ceste hardie & diuine resolution,  
 avec vne admirable pratique de ceste sentence  
*Infirma mundi elegit Deus, ut confundat fortia*, ou *I. Cor. I.*  
 comment sa naturelle douceur a peu comparit  
 avec cest acte.

Que si voulez voir la description de ce don *Aug. lib. I. de*  
 du saint Esprit en saint Augustin, en saint *ser. Domini*  
 Gregoire, en saint Bernard, vous trouuerez que *in monte c. 9.*  
 mon aduis n'est dissemblable à celuy de ces *Greg. ho. 19.*  
 saints Peres. *in Ezech. Ber*  
*nar. serm. seu*

Vous l'appellez parricide, comme s'il auoit *tractatu de*  
 esté meurtrier de son pere, ou du pere public, *donis spiritus*  
 dictes moy ie vous supplie, celuy seul merite il *santi c. 4.*



pas le nom de pere qui donne la vie à ses enfans ? deffunct Henry l'ostoit : le pere nourrit, cestuy affamoit : Le pere ayme, cestuy haïssoit : Le pere est doux & bening, & ayant esté offensé, s'appaise, cestuy estoit cruel, & s'irritoit sans auoir esté offensé : Le pere dresse ses enfans à la vertu, cestuy-cy ses subiects à toute corruption & vilenie. Ce que cest congneu plus que iamais par le rapport d'aucuns qui en pouuoient bien testifier, & encores plus certainemēt par les vers & lettres escrites de sa main propre, que ie voudrois n'auoir veues pour l'horreur & indignation cōtre le deffunct que cela ma laissē en l'esprit. Le pere cherit, & fait du mieux qu'il peut, cestuy-cy a tousiours fait du pis qu'il a peu, ou en renard, ou en lyon. Le m'en rapporte à la demonstratiō qu'il feit de ceste douceur paternelle & ordinaire bonté vn peu auant sa mort quand il enuoya, pensant auoir tout gaingné, à son venerable Parlement de Tours le rolle de tous les Catholiques des bonnes villes desquels il vouloit le procez estre fait : au moins puis-je certifier de ceux de Paris, Orleans & Chartres, desquels i'ay manié l'original, qui auoient chacun en teste ces mots, *Rolle des personnes notoirement factieux esleuez en armes contre l'estat & authorité du Roy, ou qui aydent lesdits factieux de leur conseil, moyens & faculté*. Et au bas estoit escrit, fait au camp de Ponthoise le 26. Iuillet 1589. signé H E N R Y, & plus bas R V Z E, à l'vn desquels, à sçauoir celui de Paris, sa clemence auoit enrollé les Princes, Princesses, &

*Douceur de  
seu Henry de  
Valois.*



tous les notables Seigneurs Catholiques de la France. Et tant s'en faut que l'acte commis en sa personne doive estre appellé parricide, qu'il n'est pas seulement peché estant fait pour vanger l'injure faicte au peuple de Dieu, *homicidium in Psal. 5. ubi est peccatum*. (dit le Pape Honorius) *cum in vindictam populi Dei fit*. Ains cōme parle S. Bernard, est plustost appellee malicide, *Qui occidit malefactorem*, dit-il. *hic non homicida, sed malicida*, *lit. temp. c. 3.* & plane Christi vindex in his qui male agunt & Christianorum deffensor reputatur. Ce Iacobin, dis-je, n'est non plus parricide que le Chrestien qui a tué Iulian l'Apostat duquel l'acte est grandement loüé par Sozomene, *Præsertim cum propter Deum & religionem quam approbabat*, dit-il, *tam fortem & strenuum se ostenderit*. Est-il permis (me demandez vous) de tuer vn Roy? Non. Mais la constitution Apostolique enregistrée en S. Clement nous aprent que le Roy impie n'est plus Roy mais Tyran, ce sont les propres mots, *ἐν τῷ βασιλεὺς οὐκ ἐστὶν ἐν βασιλεὺς ὑπάρχων, ἀλλὰ τυραννός*. Et les anciens nous ont demonstré selon le sens commun & la loy de nature, *Quam sit pulchrum benefici gratum, fama gloriosum tyrannum occidere*. Combien est vne chose excellente, utile & digne de gloire de tuer vn Tyran, comme parle Ciceron en sa seconde Philipique, & le cōfirme en l'oraison *pro Milone* & ailleurs, d'une infinité de belles sentences, comme fait aussi notablement Sozomene au lieu preallegué: pō seulement celui qui tyranniquement enuahit le Royaume malgré les habitans, sans y auoir

Sozom. lib. 6.  
hist. eccl. c. 2.  
Question s'il  
est permis de  
tuer un Roy.  
Clem. const.  
apost. lib. 8.  
cap. 2.

iamaïs eu droict, ou qui veut avec l'estat chan-  
 ger ensemblement la religion, & faire regner  
 l'heresie, comme on a tué iadis vn Admiral  
 Colligny en France, & vn Prince d'Orange au  
 pais bas: mais aussi celuy qui estant legitimemēt  
 entre au Royaume vient a abuser de sa puissan-  
 ce. N'auiez vous pas veu comment Saul ayant  
 contreuenu notablement au commandement  
 de Dieu [non toutesfois tant que celuy-cy] &  
 priāt Samuel de demeurer avec luy, Samuel luy  
 dict, *Non reuertar tecum, quia proieciſti sermonem*  
*Domini, & proiecit te Domin⁹ ne sis rex ſuper Iſrael.*  
 Iene vous aſſiſteray plus pour ce que vous auez  
 reietté la parole de Dieu, & Dieu pareillement  
 vous a deietté, en ſorte que vous n'eſtes plus  
 Roy. Mais ſans chercher exemple ſi loing, ne  
 voyons nous pas en noſtre France comment  
 Dieu permist par ſon iuſte iugement, qu'aussi  
 toſt apres le massacre des deux Princes Catho-  
 liques, eſtāt deſcouuerte la perfidie du ſeu Roy,  
 tous les ſubiects en quelque endroit qu'ils fuſ-  
 ſent du Royaume, comme miraculeuſemēt in-  
 ſpiréz du meſme eſprit de Dieu ſe reuolterent  
 tout à coup ſans rien ſcauoir les vns des autres,  
 & toutes les villes ſe declarerent de noſtre par-  
 ty, hors mis aucunes preoccupées de Capitai-  
 nes ou gouuerneurs heretiques ou peu affe-  
 ctionnez à la religion Catholique qui n'auoiet  
 que l'heresie ou ambition & auarice en eſtime?  
 Et non ſeulement les villes perdirent tout le re-  
 ſpect & obeiſſance qu'elles luy auoient porté  
 au parauant, mais chacun ſçait que luy eſtant

8. Reg. 15.



enfermé dans Tours, assiéé de Monsieur de Mayenne, qui gagna mesme le fauxbourg de la ville. Il ne fut secouru de personne forsque du Roy de Navarre & autres heretiques, qui encore n'y eussent de guerre seruy, si par les entreprises que faisoient au tour de Paris les gens de guerre conduicts par le sieur de la Nouë & autres heretiques, mondit sieur de Mayenne n'eut esté contraint de retourner à Paris pour les mener des ennemis couverts & la nochalace capitale de ceux qui y deuoiert mettre ordre. Je ne dis pas qu'on se doive distraire de l'obeissance d'un Roy & le poursuivre pour actions mauuaises, ou iniures particulieres qu'il face à ses subiers quelques atroces qu'elles soient, en quoy faut auoir recours à la puissance superieure, c'est à dire, à la Republique si l'on peut, ou bien en patientant se recommander & sousmettre à la misericorde de Dieu qui a en sa main le cœur des Rois: mais j'entends en actions publiques tyranniques, representantes plustost l'ennemy que le Roy, le loup que le berger, le larron que le pere, l'heretique que le Catholique. Car ayant ces qualitez &

*Epist. 47*

*dum Ecclesia quem acceperat, defensorem sustinet oppugnatorem* (comme parle saint Bernard) on le doit poursuivre comme vne beste sauuage iusques à la mort, puis qu'il est plus cruel & dommageable que les plus cruelles bestes du monde. Mais il nous est donné pour Roy, dictes vous, ouy, pour Roy, mais non pas pour Tyran & Lyon. Si Dieu permet qu'il soit tel qu'y ferons nous? Et si Dieu permet que les Tygres & On-



ces mangent nos enfans qu'y ferons nous il les faut tuer, direz vous; ce sont bestes des raisonnables & nuisibles: Aussi sont tels Rois encorés plus nuisibles & desraisonnables, & plus ennemis des hommes. Et partant quand par vne autorité publique ils sont declarez tels ( que l'on appelle diffidéz ) il n'y eut iamais loy diuine ny humaine, il n'y eut iamais Theologie qui empeschast de les tuer, ains cōme ils sont alors priuez de tout droit de principauté, & declarez ennemis publics, aussi sont-ils consequemment exposez en proye à vn chacun qui les voudra, aufera & pourra tuer. Et cest vn sacrifice agreable à Dieu & vn bien singulier pour le public: & quand au particulier, *miles Christi securus interimit; interit securior* (dit S. Bernard au lieu sus allegué) *sibi prastat cū interit, Christo cū interimit.*

*A sçauoir s'il est permis à vn religieux ou Ecclesiastique de se mesler de la guerre.*

Mais il n'estoit gendarme, dictes vous, il estoit Religieux. Je vous responds que ( pre-supposé la guerre iuste ) *obsequo licet occidere obsequens*: & qu'en extreme necessité ( comme lors que nos forces n'estoient encorés arriuees ) & en guerre deffensue, & principalement quand il y va de la religion tout le monde est gendarme, s'il faut vser de ce mot. Et non seulement est permis à vn chacun de prendre les armes, mais est chose meritoire deuant Dieu à qui se sent auoir assez de cœur pour ce faire: & quand mesmes les plus austeres, comme Chartreux ou Cappucins sortiroient de leurs cloistres & cellules pour cest effect; il n'y auroit coulpe mortelle ny venielle, ains occasiō de meriter, la cha-

rités les mouuant à exposer leur vie pour le repos public, pour le bien de l'Eglise & la cause de Dieu; non toutefois pour en faire ordinaire ou y aller sans nécessité, à cause de leur veu & de la dignité du ministère Ecclesiastique. Hé, mais s'il y eut esté en vn autre habit cela eut esté plus tolerable dict-on: au contraire il y a deu ainsi aller; puis qu'il connoissoit qu'en son habit il exécuteroit plustost son dessein qu'avec la cuirasse & le couteau. Et pleur à Dieu qu'il ne tint qu'à prendre habit de Cordelier ou la cobin, & aller mesme en forme de procession comme firent iadis les enfans d'Israël au tour de Hierico que nous n'eussions la fin du Blarnoïs & de ses adherans: on en dispenserait bien sans aller à Rome. *us brant*

C'est vne detestable trahison, voulez vous dire, de porter lettres, user de paroles dissimulées, & cependant auoir intention de tuer son Prince: Ouystes vous iamaïs appeller trahison quand ayant fait faire vn couteau tout à propos & pendu souz son manteau à la ceinture (comme porte le texte des Iuges) & présenté des dōs au Roy Eglon, & puis luy ayant dit qu'il auoit vn mot de secret, mesmes de la part de Dieu, a luy dire, luy donna du couteau dedans le ventre, *Infixitque in ventrem eius ram validē, ut capulusque recurserit in vulnere, & reliquit in corpore.* Et quand Iudith s'estant recommandee aux prieres des enfans d'Israël, *Orate ut firmum faciat Deus consilium meum;* & fait elle-mesme ses

*A sçauoir se  
le fait de la  
cobin d'ou  
estre appelé  
trahison.*

*Iudic. 3.*

*Iudith. 3.*

prieres a Dieu avec ieunes & austeritez, cōme à son exemple à fait le bon Religieux, & depuis ayant vſé tant de paroles feintes & dissimulees aux gardes & à Holoferne mesme (cōme a faict encores celuy-cy, dont portera bon tesmoignage vostre cousin la Guesle iadis Procureur du Roy) pour emporter la teste dudit Holopherne & faire leuer le siege de deuant Bethulie, qui appella onques cela trahison? Comparaison faicte mesmement par nostre saint Pere depuis peu de temps, lequel y adiousta que le Iacobin estoit encore à preferer à Iudith, d'aurāt qu'elle rua vn homme ia comme mort, à sçauoir estant en vn profond sommeil, & celuy-cy vn hōme veillant & qui estoit en perpetuelle deffiance, & qui n'auoit iamais esté simple que ceste fois là. Appellerez vous trahison le fait de Sanson, quand il se fait conduire aupres des deux colonnes qui sostenoient la maison où estoit la nobleſſe & grand nombre de Philistins, feignant se vouloir seulement appuier & reposer contre icelles, veu que son intention estoit de les oster & faire mourir les Philistins comme il feit? Et dauantage, *dolus an virtus quis in hoste requirat*, dit le Poëte, Et n'y a aucun intereſt pour la conſcience si l'on combat ouuertement ou par embuches, dit saint Augustin, *utrum aperte pugnet aliquis an ex insidiis, nil ad iustitiam interest*. Je pourrois adiouster (supposé que Henry fust chargé de ces drogues ordinaires) que trahison ne pouuoit estre exercee contre luy, l'vn de ses Caractheres l'en preseruant, tesmoing ce qui estoit

Aug. lib. 83.

quest. q. 10.

*Et habetur*

23. q. 2. cap.

*Domini.*



estoit escrit au tour, *qui hoc signum secum portabit, ab aliquo tradi non poterit* : & adiouster ceste belle priere qui estoit contre ses ennemis en son cartel : Et pour cela que ce coup n'auroit deu [par sa religion] estre appellé trahison : mais ie laisse ceste vanité & diabolique superstition.

Si Dieu eut approuué ce faict, disent aucuns, le Iacobin n'y fust pas mort. Ie dis qu'il ne s'ensuit pas, & se trouue instance en Sanson, comme chacun sçait, lequel ayant dit ces paroles, *moriatur anima mea cum Philistin*, Et yestant mort en effect, Dieu a approuué ce faict & resolution, à cause qu'il estoit entrepris pour sa gloire, & le soulagement des enfans d'Israël. Que si ceste maniere d'argumenter est valable, ie pourray conclurre a meilleur droict, que si la cause de Henry de Valois eut esté iuste, Dieu n'eut iamais permis qu'il eust esté ainsi mis à mort à saint Clou, au milieu d'une puissante armee, luy touchant du doigt le but de ses souhaits, & mesmes estant aduertey qu'un Iacobin le deuoit tuer, occasion qu'on luy auoit fait adiouster à la fin de ses saintes, ie pensois dire feinctes, prieres ordinaires ce verset du Psalmiste, *Qui das salutem regibus, qui redemisti Dauid seruum tuum, de gladio maligno eripe me* : Seigneur qui sauuez les Rois, qui auez deliuré Dauid vostre seruiteur, deliurez moy du glaive pernicieux : nonobstant laquelle priere il n'a pas laissé de sentir le iuste iugement de Dieu, non pas *gladio maligno, sed benigno & beneficentissimo* : Dieu n'eut permis que les Parisiés qui à toutes les reuoltes

*A sçauoir se la mort du Iacobin est argumēt & occasio valable de pēser qu'il ayt mal fait.*

*Psalm. l. 43.*

Esod. 15.

1. Macab. 1.

Cômès nous  
deuons estre  
ristes Et ioy-  
aux de la  
mort de feu  
Héry de Va-  
bois.

des siecles passez auoiet experimētē q̄ le roy en  
fin demeueroit le maistre, eussent à ceste fois eu  
ce cōtētemēt de se voir deliurez de leur Tyrā,  
qui faisoit ia son compte de prendre la ville, di-  
stribuer le butin, assouuir son cœur felō, & faire  
passer l'esslite des gens de bien au fil del'espee,  
comme disant avec Pharaon, *Persequar & com-  
prehēdam, & diuidam spolia, implebitur anima mea,  
euaginato gladium meum, interficiet eos manus mea:*  
de se voir, dis-ie, deliurez du plus grand enne-  
my, soy disant Roy, qu'ils eussent au monde,  
dieu ne luy faisant ceste grace de rentrer iamais  
en la ville, qu'il auoit auparauant voulu traicter  
comme Antiochus auoit faict Hierusalem, *post-  
quam loquutus eis fuisset verba pacifica in dolo &  
credidissent ei,* dit le texte : Si l'heureux aduis des  
Barricades & resolutiō qui fut prise alors, n'eut  
estē enuoyee du ciel; Dieu ne permettant que  
ceste grand ville doüce de tant de saintes Re-  
liques, pourueü de tant de bons Religieux &  
autres gens de bien, vacans continuellement à  
prieres & bonnes œuures, fust pollüē de la pol-  
lution mesme.

Le sçay que nous auons grande occasion de  
nous attrister de ceste mort, pour la honte &  
vergongne que reçoit la France en la fin si mi-  
serable de ce roy, duquel tous les predecesseurs  
auoient regné avec gloire, & estoient passez de  
ceste vie avec honneur, & que nous deuons re-  
gretter encores plus l'estat de sa pauvre ame,  
laquelle est ainfi partie de ce monde garrottee  
des effroyables liens d'excommunication, en

tant que le iugement humain en peut cognoi-  
 stre, quoy que porte l'information forgée, ou  
 bien enuoyée au chasteau d'un certain Quelque  
 de par le monde, signée de sept ou huit tes-  
 moings, desquels le nom du meilleur ne merite,  
 comme ie croy, estre mis par escrit, estant tous  
*secundum presentem institutam*, reprouuez de Dieu  
 [puis qu'ils se sont bandez contre luy] & pieça  
 effacez du hure de vie. Mais pour la considera-  
 tion d'un plus grand bien qui est le salut d'une  
 infinité d'ames lesquelles glissoient en perdition,  
 & pour le soulagement que tout le pais en re-  
 ceura, moiennant la grace de Dieu, ceste honte  
 & regret n'empesche point que tous les vrais &  
 Catholiques François ne se resiouyssent, *Quia*  
*Dominus liberauit pauperem à potente & pauperem,* Psal. 71.  
*en non erat adiutor,* ne se resiouyssēt, dis-ie, d'estre  
 deliurez de celuy qui exerceoit vne telle tyrannie  
 sur les biens, les corps & les ames de ses pauvres  
 & trop humbles subiects : comme auparauāt il  
 leur auoit esté loisible, selon Dieu, de desirer sa  
 mort, voire de la causer & apporter, nō pas par  
 hayne ou appetit de vindicte, mais par zele de  
 iustice & desir du bien public. Ce qu'a escrit di-  
 ctement vn docte personnage de nostre tēps, *A scauoir*  
*s'il nous est*  
*loisible de de-*  
*finir la mort*  
*de nostre en-*  
*nemy.*  
 en ces termes, *Et si malum est optare mortem inimi-*  
*co ex odio & cupiditate vindicte, tamen optare mor-*  
*tem inimico, & etiam inferre secundum ordinem in-*  
*stitutam* [à quo non recedit quisquis publicum hostem  
 & diffidatum quoquo modo inserimit] *malum non*  
*est si fiat non odio hominis sed amore iustitie & com-*  
*munis boni.*



Act. 12.

Et pource. l'euuenement ayant succedé, selon le iuste desir, il me semble que ce n'estoit chose fortuite, mais ainsi disposée par la diuine prouidence, que le iour de ceste heureuse deliurance l'Eglise ayt chanté en l'Introite de la Messe, comme au nom de chasque Catholique, ce que lors se rencontroit, *Nunc scio verè quia misit Dominus Angelum suum, & liberauit me de manu Herodis, & de omni expectatione plebis Iudaorum*; Je diray, *de omni expectatione Politicorum*. Or voisie bien à la verité maintenât, que Dieu a enuoyé son Ange & m'a deliuré de la main d'Herodes, & de toute l'attêre des Politiques. Car qu'estoit cest Ange libérateur, sinon le Iacobin enuoyé de Dieu pour nous deliurer? qui estoit cest Herodes, sinõ Henry de Valois, sur le nom duquel, comme chacun sçait, on a trouué il y a plus de six ans [ *omine pessimo* ] cest Anagramme, *Vilain Herodes*. Anagrâme que l'esprit humain n'auoit iamais peu rencontrer en pareil nom auant sa venuë au Royaume. Qu'estoit-ce autre chose, *expectatio plebis Iudaorum*, sinon l'esperance qu'auoient les deux Henrys & tous leurs adherens, qui auoient autant de religion & de conscience que ces miserables Iuifs qui lors estoient mis en sens reprouué? Car vous sçauéz comme ce feu bon Roy auoit par sa subtile & artificielle bôté & clemence disposé le cœur des vns & des autres à l'endroit de ceste ville de Paris, & animé tous ceux qu'il auoit peu à la ruine d'icelle, tesmoing le Roy de Nauarre, auquel il fit entêdre qu'il y alloit de son faict, & de toute sa maison,

& de sa religion, & qu'il ne falloit plus rien prétendre s'ils failloient à ce coup à Paris, tesmoin tous les huguenots, ausquels il remōstroit qu'ils auoient alors ce que tant ils auoiēt desiré, à sçauoir, le Roy à leur deuotion, & la ville de Paris en proye: tesmoing le Duc d'Espernō auquel il faisoit bien sentir comme les Parisiens estoient ceux qui aux Eitars auoient le plus declamé cōtre luy: tesmoing tous les partizans & officiers, du deportement desquels il ramenteuoit les ordinaires plaintes faictes par les Parisiēs: tesmoin plusieurs soldats, Capitaines & Gentils-hōmes, qui bien qu'ils eussent receu argent des villes Catholiques, neantmoins leur estant remōstré l'esperance de butin, postposoient le fait de la religion: tesmoing plusieurs grands engagez aux Parisiens, pour l'excessiue despense qu'ils faisoient pour paroistre en Cour, ausquels il faisoit entendre qu'il n'y auoit plus beau moyē de s'acquitter que la ruine de Paris: tesmoing tous les meschās & vaunēans du Roiaume, ausquels il faisoit sonner qu'ils auoiēt tel interest que luy à ceste querelle, q̄ leur fortune estoit ioincte à la siēne, & q̄ pour leur conseruatiō il falloit à ceste fois mettre le tout par le tout. Qui a esté cause que les Parisiēs se voyans par la main de ce zélé Religieux deliurez de ce danger, se sont fort réiouys, & à bōne occasiō ont chanté avec Moïse & les enfans d'Israël deliurez de leur Tyran, *Dextera tua Domine percussit inimicum, & in multitudine gloria tua deposuisti aduersarios nostros, Sci-* Exod. 15.  
gneur vostre dextre a frappé l'ennemy, & à vo-

Psal. 30.

estre grande gloire auez ruiné & debouté de leur  
esperance nos aduersaires: & auec Dauid, *Quā magna multitudo dulcedinis tua domine quā abscondisti  
timentibus te, perfecisti eis qui sperant in te in conspe-  
ctu filiorum hominum.* Seigneur que vostre dou-  
ceur est grande, laquelle vous reseruez à ceux  
qui vous craignent, vous l'auez fait cognoi-  
stre à ceux qui ont esperance en vous à la venue  
de tous les hommes. Oeuure admirable de  
Dieu s'il y en eut iamais au monde, à propos du-  
quel i'ay appris que nostre saint Pere dit der-  
nieriement en consistoire ce traict du Prophete  
Abacuc (prenat ceste merueille en bonne part)

Psal. 31.

*Admiramini & obstupefite, quia opus factum est  
in diebus nostris, quod nemo credet cū narrabitur.* Ac-  
complissement de la Prophetie de ceux qui  
doiuent estre destruits & ostez de ce monde,  
& puis mocquez des hommes auec grand  
mespris, pour auoir mieux aymé faire le mal  
que le bien, & s'estre delectez a mensonges &  
paroles de tromperie, plustost que de douceur  
& de verité, *Dilexisti malitiam super benignitatem,  
iniquitatem magis quā loqui aquitatem, propterea  
Deus destruet te in fine euellat te, & emigrabit te de  
tabernaculo tuo. & radicem tuam de terra viuentium,  
videbunt iusti & timebunt, & super eum ridebunt,  
& dicent, ecce homo qui non posuit Deum adiutorem  
suum.* Accomplissement de ce qui a esté annôcé

1. Mat. 2.

au peuple des derniers propos de Mathathias,  
*A verbis viri peccatoris ne timueritis quia gloria  
eius floruit & vermis est hodie extollitur, & cras  
non inuenietur quia conuersus est in terram suam, &*



*cogitatio eius periit*, Ne craignez point les paroles  
 de l'homme pecheur, car sa gloire n'est que ver  
 & ordure, auioird'huy il sera esleué, mais de-  
 main ne sera pas trouué, pource qu'il retourne  
 en la terre & est la pensee perie. Instruction  
 pour les Rois qui estans mis en honneur s'ou-  
 blient, & sont faicts semblables aux bestes bru-  
 tes, *Homo cū in honore esset nō intellexit, &c.* & qui *Psal. 43.*  
 pésent estre sauuez par leur grāde puissance, de  
 laquelle esperance ils se trouuent deceuz, *Non*  
*saluatur rex per multam virtutem.* Qui seruiront *Psal. 32.*  
 d'exemple aux Rois qui viendront apres eux  
 de craindre la souueraine majesté, de laquelle  
 ils dependent, suiuant l'exhortation de ce sage  
 Roy Dauid, *Et nunc reges intelligite, erudimini qui*  
*iudicatis terram, seruite Domino in timore.* Instru- *Psal. 2.*  
 ction pour les mondains à recongnoistre cy  
 apres de ne point mettre leur esperance aux  
 Princes, *Nolite confidere in principibus, nec in filiis*  
*hominum, in quibus non est salus,* de ne se plus me- *Psal. 145.*  
 surer à la reigle, *Te facimus fortuna Deum,* afin  
 qu'on ne dise point d'eux, comme on dit au-  
 iourd'huy des Politiques, *ubi sunt dii in quibus*  
*habebant fiduciam?* Instruction pour leurs enfans *Psal. 32.*  
 à ce qu'ils apprennent à mettre leur esperance  
 en Dieu & à garder ses commandemens, afin  
 qu'ils ne soient faicts comme leurs peres gene-  
 ration meschante & rebelle, suiuant la doctrine  
 du Psalmiste, *Filij qui nascuntur & exurgunt, &*  
*narrabunt filiis suis ut ponant in Deo spem suam, &*  
*non obliuiscantur operum Dei, & mandata eius ex-*  
*quirant ne fiant, sicut patres eorum generatio praua* *Psal. 75.*

Psal. 101.

*Et exasperās. Et pour toute la posterité, Scribatur hac in generatione altera, & populus qui creabitur laudabit Dominiū, quia prospexit de excelso sancto suo, Dominus de calo in terram aspexit, ut audiret gemitus compeditorum, & solueret filios in-eremptorum, ut annuncient in Sion nomen Domini. Que ces choses soient enregistrees pour la posterité, & le peuple qui cy apres naistra en louera Dieu, pource qu'il a regardé de son haut ciel en terre, pour ouir les pleurs des captifs & deliurer les enfans de ceux qui ont esté mis à mort, afin que l'on celebre en Sion, ie diray en France, le saint nom du Seigneur. Ce que i'espere par la diuine bonté que nous verrons bien tost.*

*La mort du  
feu Roy, utile  
au Roiaume.*

Et pourtāt il vous plaira, Monsieur, moderer vostre passion, corriger vostre escrit en cest endroit, & croire avec nous que quant au faict il ne peut apporter la ruine du Royaume, ny de la religion Catholique comme vous escriuez, ains est vne occasion rare, si nous en pouuons bien ayder, pour empescher la ruine de l'un & de l'autre, *della quale occasione non si puo dire altro* (comment parlent les lettres enuoyees nagueres par sa saincteté au conseil de l'Vnion, que i'ay entendues par discretion) *senon che ci sia stata messa auanti della potente & misericordiosa mano de Dio.*

*Le Iacobi  
n'a cherché sa  
mort.*

Quant à celuy qui l'a commis, que l'on dict auoir temerairement cherché sa mort, c'est autre chose de chercher sa mort, autre chose de chercher la gloire de Dieu & le repos public au danger de sa vie. Et tant s'en faut que ce genre de mort du Religieux soit reprehensible, que pro-  
uenant

uenant d'une telle force, magnanimité, zele & charité, laissant à part la reuelation qu'on dit qu'il a eue, de quoy ie ne suis assez informé, ie le reputé treslouable & proche de martyr, ne me pouuant ranger à l'opinion de ceux, ou qui appertement l'improuuet, ou qui en parlent si ambiguement que le peuple en est iustement scandalizé, quelques Pasteurs Hierarchiques ou autres scrupuleux qu'ils puissent estre. Non que ie vueille soustenir comme article de foy qu'il soit martyr, l'Eglise ne l'ayant encores déterminé: mais estant neantmoins certain que le contraire ne se peut soustenir sans grande temerité & presumption, ou sans apperte & sanglante malice. Dont ie ne puis autre chose conclure sinō, *Deus ultionum, Dominus Deus ultionum libere egit.* Le Seigneur Dieu des vengeance, le Dieu des vengeance en a disposé comme il luy a pleu. Psa. 93.

Au reste quant à vostre stile que ie trouue aigre par toute vostre missiue, touchant le fond du party que nous tenōs, ie ne veux icy débattre le merite de nostre cause (i'entends du party de l'Vnion qu'auiez si fort en horreur, & auquel dites *ne vous pouuoir persuader d'y deuoir adherer*) esperant que cy apres daignerez prendre la peine de lire quelques discours faictz à ce propos, & specialement le dernier diuulgué, *de iusta Henrici tertij abdicatione à Francorum regno*; ou plustost que sans aucune lecture ayant repris vos esprits, ces brouillarts & fumees de Cour estans dissipées, qui vous offusquoiet cy deuant, & vos passions estās suppeditees par la raison, iugerez

*Esper de voir  
renuoir à l'union  
les desuoyez.*



sainement avec nous (comme auez faict autre-  
fois) que c'est vn œuvre de Dieu & remede v-  
nique de la conseruation de la religion Catho-  
lique en nostre France, & consequemment la  
pourre iurer en toute seurere de conscience, le deuez  
faire, & ne vous sera deshonneſte, & lors la ville ca-  
pitale vous sera libre, & la plus part des autres, &  
vous pourra on laisser iouyr de vostre maison sur ces  
nouuelles declarations & accidens. Si ce n'est ou  
que vostre long delay vous preiudicie, ou que

*Fides Blesen-  
sis, oste le lieu  
à l'ancien pro-  
uerbe, Fides  
Punica.*

*Punica religioe seruata fides*, c'est à dire, la perfidie  
Blaisiène, surpassant la Punique, qui s'est recô-  
gneuë fraischement auoir pullulé en plusieurs  
de la Noblesse, au preiudice de la religion Ca-  
tholique, ne cause quelque defiance de vous.

Et ce pendant si voulez choisir party de l'un  
des Bourbons selon la conscience, il me semble  
que ne deuez auoir esgard à la prison de celuy,  
qui yest à nostre tresgrâd regret detenu, puisque  
la prochaineté de sâg, puisque les veuz publics,  
[la vraye religion y estant notablement cōioin-  
cte] luy attribuent ce droict. Et me semblét fort  
aueuglez & desnaturez ceux [& plus ses neueux  
propres que tous les autres] qui ayans le choix  
des deux, disent comme autresfois ont fait les  
Iuifs reprouuez, *Non hunc sed Barrabam*, aymans  
mieux que Iesus-Christ innocēt fut mis à mort,  
que l'insigne larron Barrabas.

Que s'il n'y a que ces deux partys que  
mettez en vos lettres, à sçauoir celuy de la Li-  
gue & celuy du Roy de Nauarre, & que ne vou-  
liez pour respect de la religiō adherer à l'un, &

que ne puissiez, pour l'auoir iusques à la mort du feu Roy iugé comme contre Dieu & raison, adherer à l'autre, Il faut necessairement ou que vous demeuriez sans Roy, ou que vous trouuiez vn party troisieme.

Mais i'espere avec vous de la bonté de Dieu qu'il *Act. 9.*  
vous conseillera & conduira à ce qui est de son honneur & de vostre salut: Et que nostre Seigneur vous ayant dict comme à S. Paul, *Ego sum Iesus quem tu persequeris: durum est tibi contra stimulum calcitrare.* Je suis Iesus celuy lequel tu persecutes, il t'est dur & dommageable de regimber contre l'eguillon. Vous luy demanderez, *Domine quid me vis facere?* Seigneur que vous plaist-il que ie face? Et alors vous fera entrer en la sainte compagnie de l'Vnion, en laquelle les troyes tomberont de vos yeux & recouureront la veüe, cômme a fait le mesme S. Paul par le ministration d'Ananias: & ayant leué toutes les taches qui ont par cy-deuant souillé vostre reputation & vostre conscience seruirez à Dieu à bon escient, & non en apparence exterieure seulement, & bié vsant du talent qu'il vous a si liberalement departy, apporterez (comme a fait ce mesme vaisseau d'election) vn grand fruit à son Eglise.

Je prie Dieu, Monsieur, qu'il vous en face la grace, & à moy de vous baïser les mains en ceste qualité. De nostre petite estude à Paris le 15. Septembre 1589.

Vostre humble seruiteur & affectionné à  
vostre salut comme au sien propre.

H ij

Periode extraicte de la Bulle du Pape Sixte 5.  
scant aujourd'huy au siege S. Pierre touchant le  
doute de monsieur du Mans sur la recognois-  
sance de Henry de Bourbon, pretendu Roy de  
Nauarre.

*Præcipimus & interdicimus vniuersis & singulis,  
ne illi eiusue monitis, legibus & mandatis audeant  
obedire: qui secus fecerint, eos excommunicationis sen-  
tentia innodamus e& ipso.*

Nous cōmandōs & interdisōs à tous en ge-  
neral, & à chacun en particulier de ne luy obeir,  
ou à ses aduertissemens, loix & commandemēs:  
Ceux qui en feront autrement nous les excom-  
muniōns de ce mesme fait.

*Priere du Iacobi mentionnee en la  
responſe susdicte.*



Dieu tout-puissant & pere de mise-  
ricorde en quel estat, de quelles œu-  
res avec quelle penitence appaise-  
rons nous vostre ire depuis si long  
temps enflambeẽ contre nous? Mais plustost  
Seigneur avec quelle pureté & simplicité de vie,  
par quelle abstinence de delices & amendemēt  
des concupiscences charnelles pourrons nous  
meriter vostre grace? quand aucuglerez vous  
les gardes, romprez les chaines, & faulſerez les  
prisons de ceux qui sont captifs pour vostre  
querelle? quand verrons nous miracle de vostre  
bonté? quand verrons nous nos Prophetes ga-  
rantis de la furie de ces liōs pour faire autoriser  
vostre S. nom & prescher vostre sacree parole



publiquement & sans contradiçtiō par tout ce Royaume: l'innocēce & la foy, les prieres & la deuotion de ceux qui ont souffert le martyre du fer & du feu pour la conseruation des Catholiques François, sont elles pas employees pour leurs parens, & pour ceux qui sont vnīs par foy & charité avecque vous & avecque eux? Faites, Dieu tousiours veritable, que le merite de vostre mort & la memoire de leur supplice rendēt nos pechez remissibles, & nos oraisons acceptables deuant vostre Majesté, sans que nos iniquitez s'opposent iamais à vostre misericorde, ny nos passions mōdaines à vostre patience. Nous sçauons bien que vous auez trop de subiect de nous punir, & nous trop peu de repentāce, puis que nous nous opiniastrons dans nos propres malheurs, nous armons cōtre nous-mesmes, & separons nos ames de vostre misericorde & de nostre salut. Mais quoy, les douceurs du peché ont tellement charmé nos sens & esbranlé nostre raison, que nous ayons mieux consentir à nostre perte, pour vn peu de plaisir, que nous retirer du mal avec vne estroicte reformation & de nos actions & de nos pensees. C'est donc iustement, & à bon droict que vous vous riez de nos desseins, vous faictes reüssir le contraire de nos entreprinſes, vous bouleuersez les plus asseurez fondemens de cest estat, puisque vous y estes si mal seruy & recogneu & avec tant de feintise: vous estes continuellement requis d'inspirer à bien faire, & nous bien conseiller, ceux qui sont aux charges & reputez les plus sages.

de ceste Republique François, & se sont eux qui nous vendent. Vous estes nuit & iour prié de chasser nos ennemis loing de nos murailles, & nous les soudoyons chez nous à nos propres despens. Vous estes sans cesse sollicité de nos vœus & importuné de nos prieres pour retirer nos cœurs du monde & les esleuer à la cōtemplation de vos miracles, & nous pauures infensez les rappelons du ciel pour les engager aux negoces & commerces de la terre : ainsi nous choisissons le mal pour le bien, le fiel pour le miel, & troquons par nos pechez les aîles de la paix avec les chaudes & sanglantes alarmes de la guerre : ainsi payons nous l'amende de nos folies & l'intérêt de nos plaisirs, Vous cognoissez, Seigneur, les deportemens de nostre Saül, vous ne pouuez ignorer l'hypochrisie de laquelle il vous a feruy, & la verge de fer dont il a massacré vostre peuple. Que dis-je Seigneur, vous avez esloigné vostre benedictiō de sa race, & caché vostre face de deuāt ses inhumanitez. Vous avez congneu le venin de sa langue & ne l'avez point voulu exaucer. Vous avez tousiours decouvert les intentions de ses paroles differētes, & luy avez donné le contraire de ce qu'il demandoit. Orés qu'ils nous oppresse & de fait & de menasses, à ce coup qu'il doit faire regorger nos fleues du sang de nos parens, à ceste heure dis-je qu'il ne confesse rien de si grand que luy sur la terre : Esueillez nos esprits que l'amour de nous mesmes & l'ignorance de ce siecle a tenu trop long temps endormis, ouurez nos yeux

aveuglez de leur trop chere sensualité; Mōstrez leur le chemin par où tant de Martyrs sont passez, au milieu des plus cruels tourmēs & des plus espouuantesables tyrānies: Ramenteuez leur les Payēs qui n'ont faict estat de leur vie, pour au pris d'icelle apporter à leur patrie quelque soulagement: mais plustost faictes leur lire les vies de tant de simples personnages qui d'un seul coup ont donné la vie & la liberté à vne infinité de nations, ont honoré leur patrie, eternisé leur nom, & rendu mil ans apres leur posterité biē-heureuse: vne seule femme a bien mis en vaux de route cent mil hommes, tué le chef & leué le siege de sa ville: vn simple Berger a bien tué sur la place vn Geant qui sembloit inuincible, & qui commandoit absoluēment aux plus forts de la terre: moy qui suis vostre Prestre sacré, choisi & appelé à cest ordre pour vous représenter les miseres & les prieres du pauvre peuple, qui en ceste extremité iette l'œil sur vostre seule bonté, estant tresmal secouru des moyens humains: ne pourray-ie pas avec ce glauiue punir l'audace & souler l'ambition insatiable de ce Tyran qui nous tient icy assiegez: impie, excommunié, qui esgalle sa puissance à la vostre, mon Dieu? Qui vous sert d'apparence & non de cœur, qui croit que la force & la fortune disposent des Empires & non pas vostre prouidence? Ne permettez, Seigneur, que ceste ville de Paris, qui iusques à present a esté l'asseuree retraicte des Catholiques, & cōme citadelle de toute la Chrestienté, vienne en proye & tombe à la mercy de ces loups affamez, icelle estant comme le cœur qui donne vie & mouuemēt à tout le reste: Et si vous cognoissez que ce soit le bien de vostre Eglise & de ceste nostre patrie. Disposez moy à ce chef-d'œuvre, Rōy tout-puissant, assurez & fortifiez ce bras, donnez moy le courage, prestez moy la resolution pour executer vn faict de si grande consequence, sans aucune apprehension de la mort. Voyez puissance souueraine le sang des enfans masles de ce Royaume, où les mains de Pharaō se sont inhumainement baignees, qui se presente auioirdhuy deuant vostre sainte face: Voyez le grād nombre des



Catholiques espars par toutes les Prouinces qui instamment vous en demandent la vengeance: Ne patientez plus, & voyez les bras estendus de tout ce peuple qui attend sur vos ennemis l'executiō & rigueur de vostre iustice, & sur soy vostre misericorde. Je me réputeray à grace singuliere d'estre en ce faict l'organe & instrument de vos iugemēs, encore que i'y voye vn peril euident de ma vie. Car qu'est-ce de la vie d'un pauvre & inutile Moynes ains combien sa mort est-elle desirable, si l'effusion de son sang luy sert a lauer ses pechez, & ensemblément deliure les enfans d'Israël de la preparee captiuité & seruitude, & du ioug cruel de Pharaon? Hastez vous donc, ô Dieu debonnaire, de destourner ce coup & danger si proche, guidez moy, conduisez ceste affaire, & faictes heureusement reüssir ce que ie tiens m'estre par vous inspiré, ne me laissant à vne entreprinse si rare, despourueu de vostre grace. Ainsi soit-il.

*Psalm.*

*Sperate in Deo omnis congregatio populi, effundite coram illo corda vestra: Deus adiutor noster in eternum.*

Vous peuple tant que vous estes, esperez en Dieu, espendez vos cœurs deuant luy, Dieu est nostre ayde & confiance à iamais.

F I N.

*Nous soubsignez Docteurs en Theologie de la faculté de Paris, certifions n auoir rien trouué en ceste Responſe faicte à la Miſiue de l'Eueſque du Mans, qui ne ſoit edificatif & conforme à l'Egliſe Catholique Apoſtolique & Romaine.*

R. Viſeur.

G. Perſeus.

















